

Broj: 03-02-80/2026
Sarajevo, 15.01.2026. godine

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Dragan Mioković, predsjedavajući
- Dom naroda - ✓
gosp. Tomislav Martinović, predsjedavajući

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 16-01-2026			
Org. jed.	Broj	Priloga	Vrijednost
01.02	-02-	303	26

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 191. i 192. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08, 26/20 i 13/24) i čl. 186. i 187. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09, 24/20 i 60/24), **radi razmatranja i usvajanja po hitnom postupku, dostavljam Vam PRIJEDLOG ZAKONA O RAČUNIMA ZA PLAĆANJE**, koji je utvrdila Vlada Federacije Bosne i Hercegovine na 65. sjednici, održanoj 14.01.2026. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



Prilog:

- Prijedlog zakona na bosanskom jeziku (CD),
- Izjava o usklađenosti,
- Obrazac broj 2 i
- Obrazac IFP NE.

**Co: Federalno ministarstvo finansija -
Federalno ministarstvo financija
gosp. Toni Kraljević, ministar**

BOSNA I HERCEGOVINA
FEDERACIJA BOSNE I HERCEGOVINE
VLADA

EI

PRIJEDLOG

ZAKON
O RAČUNIMA ZA PLAĆANJE*

Sarajevo, januar 2026. godine

PRIJEDLOG ZA DONOŠENJE ZAKONA PO HITNOM POSTUPKU

Predlažemo da se Zakon o računima za plaćanje donese po hitnom postupku, u skladu s članom 191. Poslovnika Predstavničkog doma („Službene novine Federacije BiH“, br. 69/07, 2/08, 26/20 i 13/24) i članom 186. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), koji predviđaju da se zakon može donijeti po hitnom postupku samo ako se tim zakonom uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo izazvati štetne posljedice za Federaciju Bosne i Hercegovine (u daljem tekstu: Federacija).

Obrazloženje:

Donošenje Zakona o računima za plaćanje predstavlja jedan od ključnih koraka u modernizaciji pravnog i institucionalnog okvira platnog prometa u Federaciji, te njegovom potpunijem usklađivanju sa savremenim evropskim standardima, naročito sa Direktivom 2014/92/EU, Direktivom 2018/843/EU, Uredbom 2016/679/EU i Uredbom 2015/751/EU. Donošenjem Zakona očekuje se unapređenje pružanja usluga plaćanja korisnicima s osnova povećanja transparentnosti i uporedivosti naknada koje su povezane s računom za plaćanje, a u skladu sa najboljim međunarodnim praksama.

Pored namjere da se domaći platni promet modernizuje i približi visokim zahtjevima evropskih direktiva, donošenjem ovog zakona Federacija bi doprinijela ispunjavanju zahtjeva BiH u vezi sa članstvom u SEPA međunarodnom platnom sistemu.

Zakon omogućava otvaranje tržišta platnih usluga za nove, nebankarske pružaoce, čime se jača konkurencija, podstiču inovacije i stvaraju uslovi za smanjenje cijena platnih usluga za građane i privredu. Istovremeno, uvode se viši sigurnosni standardi, jačaju mehanizmi upravljanja operativnim i sigurnosnim rizicima, te se unapređuje zaštita korisnika platnih usluga, naročito u kontekstu neautoriziranih transakcija i elektronskih plaćanja.

Poseban značaj Zakona ogleda se u njegovoj ulozi u ispunjavanju regulatornih preduslova za pristupanje Bosne i Hercegovine SEPA području (Single Euro Payments Area). Pristup SEPA sistemu omogućit će građanima i privredi da vrše bezgotovinska plaćanja u eurima pod istim uslovima kao i u državama članicama Evropske unije, uz niže troškove, veću brzinu i veću pravnu sigurnost prekograničnih transakcija. Time se uklanjaju postojeće razlike između domaćih i prekograničnih plaćanja i jača finansijska integracija Bosne i Hercegovine sa evropskim tržištem.

Ulazak u SEPA područje predstavlja strateški i istorijski iskorak ka dubljoj integraciji finansijskog sistema Federacije u evropski finansijski prostor, unapređenju konkurentnosti domaće privrede, smanjenju troškova poslovanja, jačanju bezgotovinskog plaćanja i smanjenju sive ekonomije. Ujedno, ovaj proces doprinosi ukupnoj ekonomskoj konvergenciji Bosne i Hercegovine sa Evropskom unijom i predstavlja važan korak u pripremama za buduće članstvo u Evropskoj uniji.

Stoga se donošenje Zakona o platnim uslugama i usklađivanje sa SEPA standardima ne posmatra samo kao regulatorna obaveza, već kao strateška razvojna mjera od dugoročnog značaja za finansijsku stabilnost, ekonomski rast i zaštitu interesa građana i privrede Federacije.

ZAKON

O RAČUNIMA ZA PLAĆANJE

DIO PRVI - OPĆE ODREDBE

Član 1. (Predmet zakona)

Ovim zakonom uređuju se računi za plaćanje i usluge povezane sa računima za plaćanje, vrste računa, osnovni račun, prebacivanje računa fizičkih lica, registri računa i registri sefova, prinudna naplata i transparentnost i uporedivost naknada povezanih sa računima za plaćanje na teritoriji Federacije Bosne i Hercegovine (u daljem tekstu: Federacija).

Član 2. (Usklađenost sa propisima Evropske unije)

Ovim se Zakonom vrši djelimično usklađivanje sa sljedećim sekundarnim izvorima prava EU:

- Direktiva 2014/92/EU Evropskog parlamenta i Vijeća od 23. jula 2014. godine o uporedivosti naknada povezanih s računima za plaćanje, prebacivanju računa za plaćanje i pristupu računima za plaćanje s osnovnim uslugama;

- Direktiva 2018/843/EU Evropskog parlamenta i Vijeća od 30. maja 2018. godine o izmjeni Direktive (EU) 2015/849 o sprječavanju korištenja finansijskog sistema u svrhu pranja novca ili finansiranja terorizma i o izmjeni direktiva 2009/138/ES i 2013/36/EU;

- Uredba 2016/679/EU Evropskog parlamenta i Vijeća od 27. aprila 2016. godine o zaštiti pojedinaca u vezi s obradom ličnih podataka i o slobodnom kretanju takvih podataka te o stavljanju van snage Direktive 95/46/EZ

- Uredba 2015/751/EU Evropskog parlamenta i Vijeća od 29. aprila 2015. godine o međubankarskim naknadama za platne transakcije na osnovu kartica.

Član 3. (Pojmovi)

(1) Pojedini izrazi upotrijebljeni u ovom zakonu imaju sljedeća značenja:

- imaoci računa za plaćanje (u daljem tekstu: imaoци) su: pravna lica i dijelovi pravnih lica, odnosno privredna društva, javna preduzeća, banke i druge finansijske organizacije, platne institucije, udruženja, javne institucije, organi uprave, organi jedinica lokalne samouprave, te ostali oblici organizovanja čije je osnivanje registrovano kod nadležnog organa ili osnovano zakonom, fizička lica koja samostalno obavljaju registrovanu poslovnu djelatnost (u daljem tekstu: poslovni subjekti), kao i fizička lica koja u skladu sa propisima vrše plaćanja preko računa te strana pravna i fizička lica;
- banka je pravno lice čije je osnivanje, poslovanje, upravljanje, nadzor i prestanak rada uređeno propisima o poslovanju banaka;
- pružalac platnih usluga je pravno lice čije je osnivanje, poslovanje, upravljanje, nadzor i prestanak rada uređeno propisima o platnim uslugama i koja ima dozvolu Agencije za bankarstvo Federacije Bosne i Hercegovine (u daljem tekstu: Agencija);

- d) račun za plaćanje je račun kojeg otvara pružalac platnih usluga u ime imaoca i koji se koristi za izvršavanje platnih transakcija;
- e) trajni nosač podataka je sredstvo koje imaocu omogućava čuvanje podataka upućenih lično njemu, na način da mu ti podaci ostanu dostupni za buduću upotrebu tokom perioda primjerenog svrsi podataka i koji omogućava reproduciranje sačuvanih podataka u nepromijenjenom obliku;
- f) pasivna kamatna stopa jeste svaka stopa po kojoj se plaćaju kamate imaocu u pogledu novčanih sredstava koja se nalaze na računu za plaćanje.

(2) Pojedini pojmovi koji su definirani u propisu o platnim uslugama, imaju isto značenje i u ovom zakonu, ako nije drugačije određeno ovim zakonom.

(3) Izrazi koji se koriste u ovom zakonu, a imaju rodno značenje, odnose se jednako na muški i ženski rod.

Član 4. (Primjena drugih propisa)

Pri obavljanju poslova povezanih sa računom za plaćanje primjenjuju se propisi koji uređuju platne usluge, zaštitu prava i interesa korisnika finansijskih usluga, kao i odredbe propisa kojima se uređuju obligacioni odnosi i izvršni postupci.

Član 5. (Bankarske usluge)

Banka je, pored obavljanja platnih usluga u skladu sa propisom o platnim uslugama, ovlaštena za sljedeće usluge povezane sa računom za plaćanje:

- a) otvaranje, vođenje i zatvaranje računa učesnika,
- b) vođenje evidencija računa imalaca,
- c) vođenje evidencije o redoslijedu plaćanja te drugih propisanih evidencija, dostavljanje podataka i izvještaja u skladu sa ovim zakonom i drugim propisima i
- d) izvršavanje naloga prinudne naplate u skladu sa propisima.

DIO DRUGI - RAČUNI ZA PLAĆANJE, REGISTRI I PRINUDNA NAPLATA

POGLAVLJE I. RAČUNI IMALACA

Odjeljak A. Računi za plaćanje

Član 6. (Račun za plaćanje)

- (1) Račun za plaćanje može biti tekući račun ili drugi platni račun, otvoren na osnovu ugovornog odnosa ili na osnovu propisa koji nameće obavezu otvaranja računa za plaćanje bez zahtjeva imaoca.

- (2) Mikrokreditna društva, platne institucije, društva za izdavanje elektronskog novca i javni poštanski operateri mogu voditi samo račune za plaćanje koji se koriste isključivo za izvršavanje platnih transakcija u skladu sa propisom o platnim uslugama.
- (3) Pružalac platnih usluga dužan je, prije zaključenja ugovora, imaocu dostaviti ili staviti na raspolaganje, u pisanoj formi ili elektronskom obliku informacije o svim važnim uslovima korištenja usluga povezanih sa računom za plaćanje.
- (4) Računi za plaćanje koji ulaze u sistem Jedinstvenog računa trezora, u skladu sa propisima iz oblasti budžeta i trezora, smatraju se tekućim računima.
- (5) Prilikom otvaranja računa za plaćanje fizičkom licu koji ima zakonit boravak u Federaciji, uključujući i pristup osnovnom računu iz člana 9. ovog zakona, zabranjena je svaka diskriminacija, neposredna ili posredna, a naročito po osnovu rase, spola, genetskih osobina, nacionalne pripadnosti, socijalnog porijekla, rođenja, vjeroispovijesti, političkog ili drugog uvjerenja, imovinskog stanja, mjesta boravka, kulture, jezika, starosti, seksualnog opredjeljenja i psihičkog ili fizičkog invaliditeta.
- (6) Pružaoci platnih usluga dužni su voditi evidenciju svih računa za plaćanje.
- (7) Strana fizička i pravna lica otvaraju nerezidentne račune i vrše poslovanje preko tih računa u skladu s odredbama ovog zakona i drugim propisima.
- (8) Zabranjeno je pružaocu platnih usluga da imaocu otvori skrivene račune za plaćanje ili pruži druge usluge koje omogućavaju, posredno ili neposredno, prikrivanje identiteta imaoca.
- (9) Federalni ministar finansija (u daljem tekstu: Ministar) podzakonskim aktom propisuje uslove i način otvaranja, vođenja i zatvaranja računa za plaćanje koji nisu tekući računi.

Član 7. (Tekući račun)

- (1) Tekući račun je platni račun kojeg otvara i vodi banka u ime imaoca, za namjenu izvršavanja platnih transakcija i za druge namjene vezane za usluge koje banka pruža imaocu.
- (2) Banka otvara i zatvara tekuće račune imaocima pod uslovima utvrđenim drugim pozitivnim propisima odnosno na osnovu ugovornog odnosa.
- (3) Banka je dužna, prije zaključenja ugovora o tekućem računu, imaocu dostaviti ili staviti na raspolaganje, u pisanoj formi ili elektronskom obliku informacije o svim važnim uslovima korištenja usluga povezanih sa tekućim računom.
- (4) Banka može mijenjati odredbe ugovora zaključenog na osnovu odredbi iz stava (2) ovog člana, a u skladu sa izmjenama propisa koji uređuju poslovanje banaka, zaštitu korisnika finansijskih usluga, obligacione odnose i platne usluge.
- (5) Imaoci mogu imati više tekućih računa kod više banaka, prema svom izboru, a u skladu sa odredbama ovog zakona. Kod jedne banke imalac može imati otvoren samo jedan tekući račun.
- (6) Sredstva koja se vode na tekućem računu smatraju se depozitom po viđenju.

- (7) Banka je jedina ovlaštena za otvaranje i vođenje tekućih računa. Ostali pružaoци platnih usluga ne smiju otvarati i voditi tekuće račune.
- (8) Banci je zabranjeno da imaocu otvori skrivene tekuće račune i izda štedne knjižice ili pruži druge usluge koje omogućavaju, posredno ili neposredno, prikrivanje identiteta imaoca.
- (9) Ministar podzakonskim aktom propisuje uslove i način otvaranja, vođenja i zatvaranja tekućih računa, kao i njihovu jedinstvenu strukturu, a može propisati i uslove i način otvaranja, vođenja i zatvaranja tekućih računa za izvršavanje međunarodnih platnih transakcija, kao i jedinstvenu strukturu tih računa.

Odjeljak B. Računi fizičkih lica

Član 8. (Otvaranje i evidencija)

- (1) Fizička lica kod banaka mogu otvoriti tekuće račune, račune za polaganje novčanih depozita i uloga na štednju, devizne račune i druge račune u skladu sa zaključenim ugovorom, propisima koji uređuju obligacione odnose i s ovim zakonom.
- (2) Fizička lica koriste usluge povezane sa računom za plaćanje u svrhe koje nisu namijenjene njihovoj poslovnoj ili drugoj komercijalnoj djelatnosti.
- (3) Banka je dužna voditi evidenciju računa iz stava (1) ovog člana, koji su otvoreni u toj banci, a ta evidencija se objedinjava u Registru računa fizičkih lica (u daljem tekstu: Registar).
- (4) Fizičko lice je dužno obavijestiti banku o svakoj promjeni podataka koji se vode u evidenciji računa banke, u roku od osam dana od dana promjene izvršene u odgovarajućim evidencijama.

Član 9. (Osnovni račun)

- (1) Račun sa osnovnim uslugama (u daljem tekstu: osnovni račun) je tekući račun koji se koristi za izvršavanje platnih transakcija u konvertibilnim markama i obuhvata:
- a) usluge otvaranja, vođenja i zatvaranja tog računa;
- b) usluge koje omogućavaju uplatu gotovog novca na račun za plaćanje i primanje uplata od trećih lica;
- c) usluge koje omogućavaju isplatu gotovog novca s računa na šalterima ili na bankomatima i drugim sličnim uređajima;
- d) usluge prijenosa novčanih sredstava s računa i to:
- 1) direktnim zaduženjem,
- 2) korištenjem platne kartice, uključujući plaćanja putem interneta, u slučaju kada je takva plaćanja moguće izvršiti platnom karticom koju banka izdaje fizičkom licu,
- 3) odobrenja, uključujući trajni nalog, na terminalima i na šalterima i putem sistema internet bankarstva.
- (2) Banka je dužna fizičkom licu koje ima zakonit boravak u Federaciji, a nema otvoren drugi tekući račun - na njegov zahtjev omogućiti otvaranje i korištenje osnovnog računa.

- (3) Zakonit boravak u Federaciji u vezi sa stavom (2) ovog člana označava boravak fizičkog lica u Federaciji u skladu s propisima kojima se uređuju prebivalište i boravište građana, odnosno boravak stranaca u skladu sa propisom o strancima, uključujući i stranca koji boravi u Federaciji u skladu sa propisima kojima se uređuju azil i izbjeglice ili na osnovu međunarodnog ugovora.
- (4) Banka ne smije fizičkom licu iz stava (2) ovog člana nuditi usluge iz stava (1) ovog člana u okviru osnovnog računa u obimu koji je manji od onog u kojem ih inače nudi u okviru računa za plaćanje koji nije osnovni račun. Sve banke koje vode platne račune moraju da fizičkom licu ponude osnovni račun čije otvaranje i korištenje ne smiju da ograniče ili uslove ugovaranjem dozvoljenog prekoračenja ili kreditne kartice, odnosno ugovaranjem druge dodatne usluge, o čemu su dužne objavljivati informacije o dostupnosti osnovnog platnog računa, naknadama, uslovima i načinu ostvarivanja prava na osnovni račun i pravo prigovora.
- (5) Banka je dužna na zahtjev fizičkog lica iz stava (2) ovog člana otvoriti osnovni račun, ili taj zahtjev odbiti, bez odlaganja, a najkasnije u roku od deset radnih dana od dana prijema urednog zahtjeva.
- (6) U vezi sa stavom (5) ovog člana, banka je dužna prethodno provjeriti da li fizičko lice ima otvoren tekući račun kod druge banke ili, ako ne izvrši ovu provjeru, pribaviti izjavu u pisanoj formi o tome da li kod druge banke ima otvoren račun koji mu omogućava korištenje usluga iz stava (1) ovog člana.
- (7) Banka će odbiti zahtjev za otvaranje osnovnog računa ako fizičko lice kod druge banke već ima otvoren tekući račun koji mu omogućava korištenje usluga iz stava (1) ovog člana, osim u slučaju da je dao izjavu u pisanoj formi i dostavio obavještenje druge banke da će isti račun biti ugašen nakon otvaranja osnovnog računa te ako fizičko lice odbije dati pismeni pristanak za provjeru i korištenje neophodnih podataka.
- (8) Banka je dužna odbiti zahtjev fizičkog lica za otvaranje osnovnog računa samo ako bi, zbog nemogućnosti da izvršava obaveze identifikacije i praćenja klijenata, a time i uspostavljanja poslovnog odnosa s njim, utvrđenim propisima kojima se uređuje sprječavanje pranja novca i finansiranja terorističkih aktivnosti, otvaranje takvog platnog računa imalo za posljedicu kršenje, odnosno povredu tih propisa, i dužna je da postupa u skladu sa tim propisima, kao i u slučaju da uspostavljanje poslovnog odnosa sa klijentom može da dovede do značajnog povećanja reputacijskog rizika po banku.
- (9) U slučaju odbijanja iz stava (8) ovog člana banka je dužna obavijestiti nadležnu policijsku upravu i provesti druge postupke u skladu s propisima kojima je uređeno sprječavanje pranja novca i finansiranja terorističkih aktivnosti.
- (10) Ako banka odbije zahtjev fizičkog lica za otvaranje osnovnog računa zbog razloga navedenih u st. (7) ili (8) ovog člana, dužna je bez odgađanja i bez naknade, pisanim putem, obavijestiti fizičko lice o toj odluci i razlogu odbijanja, o čemu je dužna da čuva dokumentaciju najmanje pet godina, osim ako bi otkrivanje razloga bilo suprotno ciljevima nacionalne sigurnosti, javnom interesu ili propisima kojima je uređeno sprječavanje pranja novca i finansiranja terorističkih aktivnosti.
- (11) Banka je dužna, u slučaju odbijanja zahtjeva za otvaranje osnovnog računa fizičkom licu, u obavijesti iz stava (10) ovog člana posebno naznačiti uputu o pravu na prigovor i mogućnost vansudskog rješavanja spora u vezi sa otvaranjem osnovnog računa, a u skladu sa propisom kojim se uređuje zaštita korisnika finansijskih usluga.

- (12) Banke su dužne da međusobno sarađuju u postupku provjere iz stava (6) ovog člana. Podaci koje banke prikupljaju i razmjenjuju u postupku te provjere mogu se pribavljati ako je lice na koje se ovi podaci odnose prethodno dalo pismeni pristanak za korištenje istih u navedenu svrhu, a u skladu s propisima o zaštiti ličnih podataka.

Član 10. **(Naknada za osnovni račun)**

- (1) Banke pružaju usluge vezane za osnovni račun uz razumnu naknadu uzimajući u obzir njene stvarne troškove.
- (2) Izuzetno od stava (1) ovog člana, naknada za usluge osnovnog računa za fizička lica koji su socijalno osjetljive kategorije korisnika finansijskih usluga ne može biti veća od 0,15% prosječne mjesečne neto plaće isplaćene u Federaciji, prema podacima Federalnog zavoda za statistiku, za prethodnu kalendarsku godinu.
- (3) Naknada po osnovu usluge osnovnog računa obuhvata:
- a) sve usluge osnovnog platnog računa iz člana 9. stav (1) ovog zakona koje nisu usluge izvršavanja platnih transakcija, to jest usluge prijenosa novčanih sredstava,
 - b) usluge izvršavanja platnih transakcija, to jest prijenosa novčanih sredstava upotrebom debitne platne kartice koja je vezana za osnovni račun,
 - c) sedam usluga izvršavanja platnih transakcija, to jest prijenosa novčanih sredstava mjesečno u pojedinačnom iznosu do 100 KM, koje banka inače naplaćuje fizičkim licima u skladu sa svojom poslovnom politikom i tarifom, a što ne uključuje plaćanja banci po osnovu korištenja njenih drugih usluga.
- (4) Za izvršenje platnih transakcija koje nisu obuhvaćene stavom (3) ovog člana banke naplaćuju naknade u skladu sa ugovorom i odgovarajućom tarifom banke, a koje ne mogu biti veće od onih koje one uobičajeno naplaćuju za izvršavanje takvih platnih transakcija.
- (5) Vlada Federacije Bosne i Hercegovine (u daljem tekstu: Vlada) će na prijedlog Ministra podzakonskim aktom utvrditi listu korisnika finansijskih usluga koji pripadaju socijalno osjetljivim kategorijama iz stava (2) ovog člana.

Član 11. **(Raskid ugovora o osnovnom računu)**

- (1) Banka može jednostrano raskinuti ugovor o osnovnom računu ako je ispunjen najmanje jedan od sljedećih uslova:
- a) osnovni račun je namjerno korišten u nezakonite svrhe,
 - b) na osnovnom računu nije izvršena nijedna platna transakcija duže od 24 uzastopna mjeseca,
 - c) korisnik je pravo na osnovni račun ostvario na osnovu neistinitih informacija,
 - d) korisnik je naknadno otvorio drugi račun pomoću kojeg može vršiti plaćanje i koji mu omogućava da koristi usluge banke u skladu sa ovim zakonom,
 - e) korisnik više nema zakonito boravište u Federaciji,
 - f) pod uslovima za raskid ugovora utvrđenim drugim zakonom.

- (2) Ako banka namjerava raskinuti ugovor o osnovnom računu zbog ispunjenosti jednog ili više uslova iz stava (1) tač. b), d) i e) ovog člana, dužna je fizičkom licu bez naknade, u pismenoj formi, na papiru ili na drugom trajnom nosaču podataka, dostaviti obavijest o razlozima za taj raskid i pozvati ga da taj razlog otkloni u roku od najmanje dva mjeseca, osim ako bi navođenje razloga bilo suprotno ciljevima nacionalne sigurnosti ili javnom interesu.
- (3) Ako korisnik ne otkloni razlog raskida i to ne dokaže u roku iz stava (2) ovog člana, ugovor o osnovnom računu raskida se istekom tog roka.
- (4) Ako banka raskine ugovor o osnovnom računu zbog ispunjenosti jednog ili oba uslova iz stava (1) tač. a), c) i f) ovog člana, raskid tog ugovora proizvodi pravni učinak odmah u trenutku dostave fizičkom licu obavijesti o raskidu. Obavijest o raskidu ugovora dostavlja se shodno stavu (2) ovog člana, bez naknade.
- (5) Banka je dužna u obavijesti o raskidu ugovora o osnovnom računu posebno naznačiti uputu o pravu korisnika na prigovor i mogućnost vansudskog rješavanja spora u skladu sa odredbama propisa o platnim uslugama i zaštiti korisnika finansijskih usluga.
- (6) Na pitanja raskida ugovora o osnovnom računu koja nisu uređena ovim zakonom primjenjuju se odredbe propisa o obligacionim odnosima.
- (7) Odredbe stava (1) tač. a) i c) i stava (6) ovog člana shodno se primjenjuju i na jednostrani raskid ostalih ugovora o računu za plaćanje koji su zaključeni sa fizičkim licem.

Odjeljak C. Prebacivanje računa za plaćanje

Član 12. **(Pružanje usluge prebacivanja računa za plaćanje)**

Pružalac platnih usluga dužan je pružati uslugu prebacivanja računa za plaćanje u istoj valuti svakom fizičkom licu koji otvori ili ima račun za plaćanje kod pružaoca platnih usluga koji se nalazi na teritoriji Federacije.

Član 13. **(Usluga prebacivanja računa za plaćanje)**

- (1) Radi prebacivanja računa za plaćanje, fizičko lice podnosi zahtjev pružaocu platne usluge (u daljem tekstu: pružalac platne usluge - primalac).
- (2) Prilikom prebacivanja računa za plaćanje, pružalac platnih usluga kod kojeg fizičko lice otvori ili ima račun za plaćanje koji želi da prebaci (u daljem tekstu: pružalac platnih usluga - prenosilac) dužan je da pružaocu platnih usluga - primaocu:
- a) prenese informacije o svim ili pojedinim trajnim nalogima za kreditne transfere, ponavljajućim direktnim zaduženjima i ponavljajućim dolaznim kreditnim transferima koji se izvršavaju na računu za plaćanje, i/ili
 - b) prenese raspoloživa novčana sredstva sa računa za plaćanje koji fizičko lice ima kod pružaoca platnih usluga - prenosioca na račun za plaćanje koji fizičko lice otvori ili ima kod

pružaoca platnih usluga - primaoca, uz zatvaranje ili bez zatvaranja računa za plaćanje kod pružaoca platnih usluga - prenosioca.

- (3) Prilikom prebacivanja računa za plaćanje ne prenosi se broj računa za plaćanje koji je fizičko lice imalo kod pružaoca platnih usluga - prenosioca na račun za plaćanje koji fizičko lice otvori ili ima kod pružaoca platnih usluga - primaoca.
- (4) Odredbe ovog zakona kojima se uređuje promjena računa primenjuju se shodno i na promjenu računa za plaćanje fizičkog lica kod istog pružaoca platnih usluga, tj. na promjenu računa za plaćanje kada je isti pružalac platnih usluga istovremeno i prethodni i novi pružalac platnih usluga.

Član 14. (Ovlaštenje)

- (1) Pružalac platnih usluga - primalac dužan je započeti sa poduzimanjem radnji koje se odnose na prebacivanje računa za plaćanje po prijemu ovlaštenja fizičkog lica za prebacivanje računa za plaćanje (u daljem tekstu: ovlaštenje).
- (2) Ovlaštenje se sastavlja u pisanoj formi, na jednom od službenih jezika u Bosni i Hercegovini, pri čemu je pružalac platnih usluga - primalac dužan, odmah nakon prijema tog ovlaštenja, fizičkom licu dostaviti njegov primjerak ili kopiju.
- (3) Ovlaštenjem fizičko lice daje saglasnost pružaocu platnih usluga - prenosiocu i pružaocu platnih usluga - primaocu za poduzimanje svih ili pojedinih radnji kod prebacivanja računa za plaćanje koje su ti pružaoci platnih usluga dužni provoditi u skladu sa ovim zakonom.
- (4) Ovlaštenjem se određuju:
 - a) trajni nalog, saglasnost za direktna zaduženja, dolazeći kreditni transferi i druge platne usluge čije se izvršenje prenosi na račun za plaćanje kod pružaoca platnih usluga - primaoca,
 - b) dan početka izvršavanja trajnih naloga i direktnih zaduženja sa računa za plaćanje kod pružaoca platnih usluga - primaoca, pri čemu ovaj rok ne može biti kraći od šest radnih dana od dana kada je pružalac platnih usluga - primalac primio dokumentaciju od pružaoca platnih usluga – prenosioca i
 - c) dan zatvaranja platnog računa, ako želi zatvaranje tog računa kod prethodnog pružaoca platnih usluga.

Član 15. (Obaveze pružaoca platnih usluga – primaoca)

Pružalac platnih usluga - primalac dužan je, u roku od dva radna dana od dana prijema ovlaštenja, podnijeti zahtjev pružaocu platnih usluga - prenosiocu da, u skladu sa tim ovlaštenjem izvrši sljedeće radnje:

- a) dostavi pružaocu platnih usluga - primaocu i fizičkom licu, ako je ono to izričito zatražilo, popis postojećih trajnih naloga za kreditne transfere i dostupne informacije o ovlaštenju za direktna zaduženja, koji se prebacuju u roku od pet radnih dana od dana prijema ovog zahtjeva;
- b) dostavi pružaocu platnih usluga - primaocu i fizičkom licu, ako je ono to izričito zatražilo, dostupne informacije o ponavljajućim dolaznim kreditnim transferima i direktnim zaduženjima kojima upravlja povjerilac koja su izvršena na računu za plaćanje u prethodnih 13 mjeseci u roku od pet radnih dana od dana prijema ovog zahtjeva;
- c) ako pružalac platnih usluga - prenosilac nema uspostavljen sistem za automatsko preusmjeravanje dolaznih kreditnih transfera i direktnih zaduženja na račun za plaćanje koji je fizičko lice otvorilo ili ima kod pružaoca platnih usluga - primaoca, prestaje primati direktna zaduženja i dolazne kreditne transfere od dana navedenog u ovlaštenju;
- d) obustavi izvršavanje trajnih naloga od dana navedenog u ovlaštenju;
- e) prenese raspoloživa novčana sredstva sa računa za plaćanje koji je fizičko lice otvorilo ili koji ima kod pružaoca platnih usluga - primaoca, na dan koji je fizičko lice odredilo i
- f) zatraži zatvaranje računa za plaćanje kod pružaoca platnih usluga - prenosioca na dan koji je fizičko lice odredilo.

Član 16. (Obaveze pružaoca platnih usluga – prenosioca)

- (1) Nakon prijema zahtjeva iz člana 15. ovog zakona od pružaoca platnih usluga - primaoca, pružalac platnih usluga - prenosilac dužan je, u skladu sa ovlaštenjem izvršiti sljedeće radnje:
 - a) ako pružalac platnih usluga - prenosilac nema uspostavljen sistem za automatsko preusmjeravanje dolaznih kreditnih transfera i direktnih zaduženja na račun za plaćanje koji je fizičko lice otvorilo ili ima kod pružaoca platnih usluga - primaoca, prestaje prihvatati dolazne kreditne transfere i direktna zaduženja na računu za plaćanje od dana navedenog u ovlaštenju, o čemu obavještava platioce i primaoce plaćanja koji učestvuju u tim transakcijama;
 - b) obustaviti trajne naloge od dana navedenog u ovlaštenju;
 - c) prenijeti raspoloživa novčana sredstva sa računa za plaćanje na račun za plaćanje koji je fizičko lice otvorilo ili koji posjeduje kod pružaoca platnih usluga - primaoca na dan određen u ovlaštenju i
 - d) ne dovodeći u pitanje odredbe ovog zakona i propisa o platnim uslugama koje se odnose na otkazni rok fizičkog lica, zatvoriti račun za plaćanje na dan određen u ovlaštenju ako fizičko lice nema neizmirenih obaveza na tom računu za plaćanje i pod uslovom da su izvršene radnje iz tač. a), b) i d) ovog stava i odmah obavijestiti fizičko lice ukoliko neizmirene obaveze sprječavaju zatvaranje njegovog računa za plaćanje.
- (2) Pružalac platnih usluga - prenosilac ne može blokirati platni instrument prije dana utvrđenog u ovlaštenju fizičkog lica, kako pružanje tih platnih usluga fizičkom licu ne bi bilo prekinuto tokom prebacivanja računa za plaćanje.
- (3) Odredbe stava (2) ovog člana ne utiču na primjenu odredbi propisa o platnim uslugama koje se odnose na ograničenje korištenja platnog instrumenta.

Član 17. (Obaveze pružaoca platnih usluga – primaoca nakon prijema zatraženih informacija)

- (1) U roku od pet radnih dana, od dana prijema informacija zatraženih od pružaoca platnih usluga - prenosioca, pružalac platnih usluga - primalac dužan je, u skladu sa ovlaštenjem izvršiti sljedeće radnje:

- a) aktivirati trajne naloge koje je fizičko lice odredio u ovlaštenju i izvršava ih počev od dana utvrđenog u ovlaštenju;
- b) osigurati uslove za izvršavanje direktnih zaduženja koje je fizičko lice odredilo u ovlaštenju počev od dana utvrđenog u ovlaštenju;
- c) obavijestiti fizičko lice i o drugim pravima u vezi sa izvršavanjem direktnih zaduženja koja su ugovorena u skladu sa propisom kojim se uređuje jedinstveno područje plaćanja u eurima (SEPA platne transakcije - npr. pravo da se umanju iznos direktnih zaduženja, pravo davanja saglasnosti na svako pojedinačno direktno zaduženje, pravo da blokira direktno zaduženje);
- d) obavijestiti platioce koji iniciraju izvršenje ponavljajućih dolazećih kreditnih transfera, koji su utvrđeni u ovlaštenju, o računu za plaćanje fizičkog lica otvorenom kod pružaoca platnih usluga - primaoca i dostavlja platiocima kopiju ili primjerak ovlaštenja fizičkog lica, a ako pružalac platnih usluga - primalac nema sve informacije koje su mu potrebne da obavijesti platioce, nedostajuće informacije traži od fizičkog lica ili pružaoca platnih usluga - prenosioca i
- e) obavijestiti primaoce plaćanja koji iniciraju platnu transakciju za direktno zaduženje računa za plaćanje fizičkog lica, a koji su utvrđeni u ovlaštenju, o računu za plaćanje kod pružaoca platnih usluga - primaoca i o danu od kada će se direktna zaduženja izvršavati sa tog računa za plaćanje i dostavi primaocima plaćanja kopiju ili primjerak ovlaštenja fizičkog lica, a ako pružalac platnih usluga - primalac nema sve informacije koje su mu potrebne da obavijesti primaoce plaćanja, nedostajuće informacije traži od fizičkog lica ili pružaoca platnih usluga - prenosioca.

- (2) U slučaju da fizičko lice odluči samo dati platiocima i/ili primaocima plaćanja podatke iz stava (1) tač. d) i e) ovog člana, pružalac platnih usluga - primalac dužan je tom fizičkom licu, u roku iz stava (1) ovog člana, dostaviti obavještenje u pisanoj formi, koje mora sadržavati podatke o računu za plaćanje i danu utvrđenom u ovlaštenju fizičkog lica od kada će pružalac platnih usluga - primalac otpočeti izvršavanje ponavljajućih dolaznih kreditnih transfera i direktnih zaduženja.

Član 18.

(Naknade povezane sa prebacivanjem računa za plaćanje)

- (1) Pružalac platnih usluga - prenosilac i pružalac platnih usluga - primalac dužni su osigurati fizičkom licu bez naknade pristup svim raspoloživim podacima o postojećim trajnim nalogima i direktnim zaduženjima koje ima kod tih pružalaca platnih usluga.
- (2) Pružalac platnih usluga - prenosilac ne smije naplatiti naknadu fizičkom licu ili pružaocu platnih usluga - primaocu za davanje podataka koje od njega, u skladu sa članom 15. ovog zakona, zatraži pružalac platnih usluga - primalac.
- (3) Na naknadu za zatvaranje računa za plaćanje primjenjuju se odredbe ovog zakona i propisa kojim se uređuje zaštita korisnika finansijskih usluga.
- (4) Za usluge iz čl. 16. i 17. ovog zakona, osim za usluge iz st. (1) do (3) ovog člana, pružalac platnih usluga - prenosilac i pružalac platnih usluga - primalac mogu naplatiti fizičkom licu naknade koje moraju biti razumne i u skladu sa stvarnim troškovima tog pružaoca platnih usluga i ne mogu biti više od prosječnih naknada koje se za te usluge naplaćuju drugim korisnicima platnih usluga.

Član 19.

(Odgovornost)

- (1) Pružalac platnih usluga koji je uključen u postupak prebacivanja računa za plaćanje dužan je da, bez odlaganja, nadoknadi fizičkom licu imovinsku štetu, uključujući naknade i kamate, koju je fizičko lice pretrpjelo zbog toga što taj pružalac platnih usluga nije u cijelosti ili djelimično ispunio svoje obaveze iz čl. 15., 16. i 17. ovog zakona.
- (2) Odgovornost pružaoca platnih usluga isključena je u slučaju izuzetnih i nepredviđenih okolnosti na koje pružalac platnih usluga, koji se poziva na te okolnosti, nije mogao utjecati i čije se posljedice ne bi mogle izbjeći uprkos postupanju sa potrebnom pažnjom, kao i u slučaju kada je pružalac platnih usluga bio dužan primijeniti drugi propis te i u slučaju kada je finansijski gubitak posljedica obmane ili prevare od strane fizičkog lica, ili ako je fizičko lice namjerno ili grubom nepažnjom propustilo da ispuni svoje obaveze u vezi sa promjenom platnog računa u skladu sa ovim zakonom.
- (3) Odgovornost pružaoca platnih usluga utvrđuje se u skladu sa općim pravilima o odgovornosti za štetu i propisom o platnim uslugama.

Član 20.

(Informacije o prebacivanju računa za plaćanje)

- (1) Pružalac platnih usluga dužan je fizičkom licu učiniti dostupnim sljedeće informacije o prebacivanju računa za plaćanje:
 - a) obavezama i odgovornostima pružaoca platnih usluga - prenosioca i pružaoca platnih usluga - primaoca, u svakoj pojedinačnoj fazi postupka prebacivanja računa za plaćanje iz čl. 14. do 18. ovog zakona;
 - b) rokovima za izvršenje svake pojedine radnje u postupku prebacivanja računa za plaćanje,
 - c) naknadama koje se naplaćuju u postupku prebacivanja, ukoliko se naplaćuju,
 - d) informacije o tome koje podatke fizičko lice treba da dostavi i
 - e) pravu na vansudsko rješavanje sporova u skladu sa važećim propisima.
- (2) Pružalac platnih usluga dužan je fizičkom licu na njegov zahtjev, bez naknade, dostaviti informacije iz stava (1) ovog člana kao i staviti na raspolaganje i druge informacije, uključujući i informacije o sistemu zaštite depozita čiji je pružalac platnih usluga član, ako je to primjenjivo.
- (3) Informacije iz stava (1) ovog člana moraju biti dostupne fizičkom licu bez naknade u papirnoj formi ili na drugom trajnom nosaču podataka u svim prostorijama pružaoca platnih usluga kojima fizička lica imaju pristup, moraju uvijek biti dostupne u elektronskom obliku na njihovoj internet stranici i moraju se pružiti fizičkim licima na njihov zahtjev.

Odjeljak D. Računi poslovnih subjekata

Član 21.

(Poslovni subjekti)

- (1) Za potrebe plaćanja, poslovni subjekti su dužni otvoriti tekuće račune u bankama i dužni su voditi novčana sredstva na tim računima i vršiti plaćanja preko računa u skladu sa ovim

zakonom i propisom o platnim uslugama. Međusobna prava i obaveze uređuju se zaključivanjem ugovora o otvaranju i vođenju tekućeg računa.

- (2) Poslovni subjekti iz Federacije mogu otvoriti tekuće račune kod banaka sa sjedištem u Federaciji i organizacionih dijelova banaka iz Republike Srpske i Brčko Distrikta Bosne i Hercegovine, koje posluju u Federaciji i imaju dozvolu koju je izdala Agencija.
- (3) Organizacioni dijelovi poslovnih subjekata sa sjedištem u Federaciji koji posluju u Republici Srpskoj i Brčko Distriktu Bosne i Hercegovine mogu imati otvorene tekuće račune organizacionog dijela kod banaka sa sjedištem u Republici Srpskoj i Brčko Distriktu Bosne i Hercegovine, koje imaju dozvolu Agencije za bankarstvo Republike Srpske.
- (4) Organizacioni dijelovi poslovnih subjekata sa sjedištem u Republici Srpskoj i Brčko Distriktu Bosne i Hercegovine, koji posluju u Federaciji, moraju imati otvoren tekući račun organizacionog dijela kod banaka u Federaciji.

Član 22. **(Otvaranje računa)**

- (1) Banka, u skladu sa članom 7. stav (1) ovog zakona, otvara poslovnom subjektu sljedeće račune:
 - a) tekući račun,
 - b) račune organizacionim dijelovima poslovnog subjekta, koji se registruju u skladu sa važećim propisima,
 - c) račune za posebne namjene (čija je namjena utvrđena ovim zakonom ili drugim propisom: sredstva rezervi, sredstva depozita, izdvojena sredstva za posebne namjene, sredstva solidarnosti, sredstva za opremu organa uprave, sredstva za investicije, sredstva izdvojena po osnovu izdatih instrumenata osiguranja plaćanja i druga sredstva koja se izdvajaju na posebne račune),
 - d) devizne račune i
 - e) račune javnih prihoda.
- (2) Računi organizacionih dijelova poslovnog subjekta i računi za posebne namjene sastavni su dio tekućeg računa poslovnog subjekta preko jedinstvenog identifikacionog broja ili matičnog broja, ako ovim zakonom, odnosno drugim propisom nije drugačije određeno.
- (3) Banka je dužna voditi evidenciju računa iz stava (1) ovog člana, koji su otvoreni u toj banci, a ta evidencija se objedinjava u Jedinstvenom registru računa poslovnih subjekata (u daljem tekstu: Jedinstveni registar).
- (4) Poslovni subjekt je dužan obavijestiti banku o svakoj promjeni podataka koji se vode u evidenciji računa banke, u roku od osam dana od dana promjene izvršene u odgovarajućim registrima.
- (5) Ministar podzakonskim aktom propisuje način vođenja i sadržaj evidencije računa poslovnih subjekata koji vodi banka.

Član 23. **(Određivanje glavnog računa)**

- (1) Kod jedne banke poslovni subjekt može imati otvoren samo jedan tekući račun u konvertibilnim markama i po jedan račun za svaki organizacioni dio.
- (2) Kod jedne banke poslovni subjekt može imati otvoreno više računa za posebne namjene u skladu sa potrebama, odnosno propisima.
- (3) Ako poslovni subjekt u bankama ima više od jednog tekućeg računa, dužan je odrediti račun (u daljem tekstu: glavni račun) na kojem će se izvršavati nalozi za plaćanje carina i carinskih dažbina, posebnih poreza - akciza, poreza na dodanu vrijednost, poreza na dohodak i drugih poreza po posebnim propisima, nalozi za plaćanje doprinosa iz plaća i na plaće, nalozi za ostale javne prihode po posebnim propisima, nalozi za prinudnu naplatu zakonskih obaveza i javnih prihoda, nalozi za naplatu vrijednosnih papira i instrumenata osiguranja plaćanja, te nalozi za izvršenje sudskih odluka i drugih izvršnih isprava (u daljem tekstu: nalozi za prinudnu naplatu) i voditi evidenciju o neizvršenim nalogima za plaćanje.
- (4) Poslovni subjekt je dužan podnijeti zahtjev za određivanje glavnog računa banci u pisanoj formi.
- (5) Banka ne može otvoriti tekući račun poslovnom subjektu koji u Jedinstvenom registru ima blokiran račun.

Član 24. **(Glavni račun)**

- (1) Glavni račun poslovnog subjekta otvara se, po pravilu, u sjedištu poslovnog subjekta kod organizacionih dijelova banaka sa sjedištem u Federaciji ili organizacionih dijelova banaka iz Republike Srpske i Brčko Distrikta Bosne i Hercegovine koji posluju u Federaciji i imaju dozvolu Agencije. Banka vodi evidenciju tekućih računa poslovnih subjekata koji su otvorili račune u toj banci uz navođenje propisane oznake za glavni račun.
- (2) Poslovni subjekt može promijeniti glavni račun samo ako na tom računu nema evidentirane neizvršene naloge za prinudnu naplatu i drugom tekućem računu kod druge banke dodijeliti status glavnog računa, uz podnošenje dokaza u pisanoj formi banci koja vodi glavni račun o određivanju drugog tekućeg računa kao glavnog računa.

Odjeljak E. Zatvaranje računa

Član 25. **(Zatvaranje tekućeg računa imaoca)**

- (1) Banka, na zahtjev imaoca, zatvara tekući račun u skladu sa ugovorom ili po službenoj dužnosti u skladu sa propisima koji za posljedicu imaju zatvaranje računa.
- (2) Zatvaranje tekućeg računa i gašenje platne kartice fizičkom licu banka vrši bez naknade.
- (3) Banke ne mogu zatvoriti tekući račun fizičkog lica na čijem računu postoje evidentirani, a neizvršeni nalozi za prinudnu naplatu.

- (4) Banka je obavezna propisati procedure za postupanje sa neaktivnim računima i ugovorom sa imaocima urediti odnose iz istog osnova.
- (5) Zabranjeno je poslovnim subjektima čiji su računi blokirani kao i fizičkim licima na čijim računima postoje evidentirani, a neizvršeni nalozi za prinudnu naplatu, da otvaraju nove račune.

Član 26.
(Zatvaranje glavnog računa)

- (1) Glavni račun poslovnog subjekta na teret kojeg su evidentirani neizvršeni nalozi za prinudnu naplatu ne može se zatvoriti.
- (2) Izuzetno od stava (1) ovog člana, glavni račun može se zatvoriti na osnovu propisa koji kao posljedicu primjene imaju zatvaranje računa i u tom slučaju se nalozi za prinudnu naplatu evidentiraju na računu pravnog sljedbenika ili se vraćaju nalogodavcu.
- (3) Banke poslovnom subjektu, čiji su tekući računi zatvoreni, vraćaju neizvršene naloge za plaćanje koji su izdati od poslovnog subjekta, a isti se ne odnose na prinudnu naplatu.
- (4) Pružaoci platnih usluga zatvaraju račune na zahtjev, u skladu s ovim zakonom i ugovorom, po službenoj dužnosti u skladu sa propisima koji za svoju posljedicu imaju zatvaranje računa.

POGLAVLJE II. REGISTRI

Odjeljak A. Registar i Jedinostveni registar

Član 27.
(Registar)

- (1) Finansijsko-informatička agencija (u daljem tekstu: FIA) uspostavlja i vodi Registar iz člana 8. stav (3) ovog zakona.
- (2) Podaci iz Registra nisu javno dostupni i na njih se primjenjuju propisi kojima se uređuje poslovna tajna i zaštita ličnih podataka.
- (3) FIA može, na osnovu podnesenog zahtjeva u pisanoj formi ili elektronskom obliku, podatke iz Registra dostaviti, odnosno omogućiti pristup tim podacima:
- a) ako je lice na koje se ovi podaci odnose prethodno dalo pismeni pristanak,
 - b) na osnovu odluke ili zahtjeva nadležnog suda,
 - c) ako, radi obavljanja nadzora nad pružaocem platnih usluga u skladu sa ovim zakonom i propisom o platnim uslugama, to zahtijeva Agencija,
 - d) za potrebe ministarstva nadležnog za unutrašnje poslove, organa nadležnog za borbu protiv organizovanog kriminala i korupcije i organa nadležnog za sprječavanje pranja novca i finansiranja terorističkih aktivnosti, u skladu s propisima,

- e) za potrebe Porezne uprave Federacije Bosne i Hercegovine (u daljem tekstu: Porezna uprava) i drugog kontrolnog organa, u skladu s propisima kojima se uređuju poslovi iz njihove nadležnosti,
- f) za potrebe advokata radi poduzimanja pravnih radnji u cilju pružanja pravne pomoći zastupanja fizičkih i pravnih lica u ostvarivanju njihovih potraživanja, uz priloženu punomoć stranke,
- g) u vezi s postupkom izvršenja ili osiguranja na imovini imaoca računa, na osnovu zahtjeva suda, drugog nadležnog organa ili ovlaštenog lica koje, u skladu sa posebnim zakonom, ima pravni interes za prinudno ostvarenje potraživanja u tom postupku,
- h) za potrebe pružaoca platnih usluga radi otvaranja osnovnog računa, ako je lice na koje se ovi podaci odnose prethodno dalo pismeni pristanak i
- i) za potrebe pružaoca platnih usluga u postupku otvaranja računa za plaćanje fizičkom licu radi provjere statusa njegovih drugih računa, ako je podnosilac zahtjeva na koje se ovi podaci odnose prethodno dao pismeni pristanak.

- (4) Zahtjev za dobivanje podataka iz stava (3) ovog člana treba sadržavati, pored podataka utvrđenih propisom kojim se uređuje upravni postupak, podatke o pravnom osnovu i svrsi korištenja ličnih podataka, kao i druge podatke koje propiše FIA.

- (5) Subjekti iz stava (3) ovog člana podatke iz Registra mogu koristiti radi obavljanja poslova u okviru zakonom utvrđene nadležnosti, isključivo u svrhu za koju su prikupljeni i ne mogu ih dalje saopćavati ili dostavljati trećim licima, niti tim licima omogućiti pristup ovim podacima, osim u slučajevima utvrđenim ovim zakonom.

- (6) Stav (5) ovog člana primjenjuje se i na lica koja su zaposlena ili angažovana odnosno koja su bila zaposlena ili angažovana kod subjekata iz stava (3) ovog člana, a kojima su podaci učinjeni dostupnim, kao i druga lica kojima su zbog prirode njihovog posla ti podaci učinjeni dostupnim.

- (7) FIA je odgovorna za dostavljanje podataka subjektima iz stava (3) ovog člana u skladu s ovim zakonom i propisima kojima se uređuje upravni postupak i zaštita ličnih podataka.

- (8) U postupanju po zahtjevu subjekta iz stava (3) tač. h) i i) ovog člana, FIA je ovlaštena da obezbijedi samo informaciju o postojanju računa za plaćanje, odnosno informaciju o postojanju računa za plaćanje na kojem su evidentirani i neizvršeni nalozi za prinudnu naplatu iz evidencije registra računa fizičkog lica, isključujući informacije o pružaocima platnih usluga kod kojih su platni računi otvoreni i brojevima tih računa.

- (9) FIA će propisati formu i sadržaj obrasca u vezi sa stavom (3) tačka a) ovog člana.

Član 28.
(Dostavljanje podataka u Registar)

- (1) Pružaoci platnih usluga su dužni dostavljati u Registar, za svaki račun za plaćanje fizičkog lica koji je otvoren u skladu s ovim zakonom i propisom o platnim uslugama, sljedeće podatke:

- a) ime i prezime fizičkog lica, s tim da se za fizičko lice - nerezidenta dostavljaju i podaci o državljanstvu,
- b) jedinstveni matični broj fizičkog lica, odnosno drugu identifikacionu oznaku za fizičko lice - nerezidenta (broj identifikacionog dokumenta: *pasoša ili druge odgovarajuće lične isprave*),

- c) mjesto i adresu prebivališta, mjesto i adresu boravišta, ako posjeduje, a za fizičko lice - nerezidenta adresu prebivališta u domicilnoj zemlji,
- e) broj potvrde pružaoca platnih usluga o identitetu fizičkog lica - nerezidenta kojem se otvara račun na osnovu sudskog rješenja, odnosno lica koje je određeno za staratelja (na osnovu rješenja o starateljstvu),
- f) broj računa za plaćanje fizičkog lica,
- g) vrstu računa,
- h) datum otvaranja računa za plaćanje fizičkog lica,
- i) datum zatvaranja računa za plaćanje fizičkog lica,
- j) datum promjene ličnih podataka u vezi sa računom za plaćanje,
- k) podatke iz tač. a) do j) ovog stava o licima koja su ovlaštena da raspolazu sredstvima na računu za plaćanje fizičkog lica,
- l) oznaku "R" ili "N" zavisno od toga da li je račun rezidenta ili nerezidenta,
- m) status računa (aktivan, blokiran, ugašen),
- n) datum promjene statusa iz tačke m) ovoga stava,
- o) naziv pružaoca platnih usluga, općina i grad u kojoj je otvoren račun i
- p) oznaku za osnovni račun.

(2) Registar ne sadrži podatke o stanju i promjenama na računima iz člana 8. stav (1) ovog zakona.

(3) Pružaoci platnih usluga su dužni kontinuirano, odmah po otvaranju, promjeni podataka o računu i zatvaranju računa za plaćanje fizičkih lica dostavljati elektronskim putem podatke iz stava (1) ovog člana u FIA-u.

(4) Pružaoci platnih usluga su odgovorni za tačnost i ažurno dostavljanje podataka u Registar.

(5) Pružaoci platnih usluga su dužni, kod prikupljanja i obrade podataka o fizičkim licima iz stava (1) ovog člana, postupati u skladu s propisima kojima se uređuje poslovna tajna i zaštita ličnih podataka.

(6) FIA, uz prethodnu saglasnost Ministra, propisuje način i postupak dostavljanja podataka u Registar, vođenje i sadržaj Registra, kao i način i postupak korištenja podataka iz Registra.

Član 29. (Jedinstveni registar)

(1) FIA uspostavlja i vodi Jedinstveni registar iz člana 22. stav (3) ovog zakona.

(2) Jedinstveni registar iz stava (1) ovog člana predstavlja javnu evidenciju i centralnu bazu podataka računa za plaćanje poslovnih subjekata otvorenih kod pružalaca platnih usluga sa sjedištem u Federaciji i organizacionih dijelova pružalaca platnih usluga iz Republike Srpske i Brčko Distrikta Bosne i Hercegovine koje posluju u Federaciji i imaju dozvolu Agencije.

(3) Korisnici podataka iz Jedinstvenog registra su poslovni subjekti, FIA, Porezna uprava, Centralna banka Bosne i Hercegovine (u daljem tekstu: Centralna banka), kao i fizička lica koji koriste podatke iz Jedinstvenog registra u skladu sa propisima donesenim na osnovu ovog zakona (u daljem tekstu: korisnici).

(4) Podatke iz Jedinstvenog registra korisnici mogu koristiti samo za svoje potrebe i ne mogu ih koristiti u druge svrhe, niti im je dozvoljeno dalje umnožavanje i distribuiranje ovih podataka. Javnost podataka iz Jedinstvenog registra ne odnosi se na podatke čija je tajnost propisana posebnim propisima.

(5) Neposredan uvid u podatke iz Jedinstvenog registra, kao i preuzimanje podataka iz Jedinstvenog registra imaju: Agencija, Porezna uprava, Centralna banka, banke, sudovi, organi uprave i drugi organi, koji mogu koristiti podatke u skladu sa svojim zakonskim ovlaštenjima.

(6) FIA je dužna ostalim korisnicima, na njihov zahtjev, dostavljati podatke iz Jedinstvenog registra koji su javni i odgovorna je za dostavljanje podataka korisnicima.

Član 30. (Dostavljanje podataka u Jedinstveni registar)

(1) Pružaoci platnih usluga su dužni u Jedinstveni registar dostavljati podatke o otvorenim i zatvorenim računima za plaćanje poslovnih subjekata, vrsti i statusu računa, kao i blokadi i deblokadi tekućih računa, kontinuirano, odmah nakon nastanka ovih promjena u evidencijama pružalaca platnih usluga, u skladu sa ovim zakonom i propisima kojima se uređuje vođenje i sadržaj Jedinstvenog registra.

(2) Banke su dužne u Jedinstveni registar izvršiti upis depozita koji predstavljaju kolateral, tj. instrumente osiguranja potraživanja.

(3) Pružaoci platnih usluga su dužni dostavljati u Jedinstveni registar za svaki račun za plaćanje poslovnog subjekta koji je otvoren u skladu sa ovim zakonom i propisom o platnim uslugama sljedeće podatke:

- a) poslovno ime, odnosno naziv, matični broj i jedinstveni identifikacioni broj poslovnog subjekta,
- b) broj računa za plaćanje poslovnog subjekta,
- c) propisanu oznaku za vrstu računa i glavni račun,
- d) podatak o blokadi i deblokadi računa poslovnog subjekta,
- e) oblik organizovanja i šifru djelatnosti poslovnog subjekta,
- f) oznaku entiteta, grada ili općine,
- g) datum otvaranja i datum zatvaranja računa za plaćanje,
- h) druge neophodne podatke.

(4) Pružalac platnih usluga je odgovoran za ažurno dostavljanje podataka u Jedinstveni registar i njihovu tačnost.

(5) Način i postupak dostavljanja podataka u Jedinstveni registar, vođenje i sadržaj Jedinstvenog registra, kao i način i postupak korištenja podataka iz Jedinstvenog registra, propisuje FIA, uz prethodnu saglasnost Ministra i u saradnji sa Centralnom bankom i nosiocima aktivnosti uspostavljanja registra računa poslovnih subjekata u Republici Srpskoj i Brčko Distriktu Bosne i Hercegovine, radi osiguranja kompatibilnosti registra.

Član 31.
(Obaveze FIA-e)

(1) FIA je dužna:

- a) kontinuirano, odmah po prijemu obavještenja od pružalaca platnih usluga o promjenama podataka iz člana 28. stav (1) i člana 30. st. (1) i (3) ovog zakona, ažurirati podatke u Registru i Jedinstvenom registru, te osigurati identičnost podataka u Registru i Jedinstvenom registru s podacima dostavljenim od strane pružalaca platnih usluga,
- b) postupati u skladu s propisima koji uređuju poslovnu tajnu i zaštitu ličnih podataka kod prikupljanja, obrade i davanja podataka iz Registra i Jedinstvenog registra, te osigurati sigurnost i povjerljivost podataka i poduzeti sve tehničke i organizacione mjere u cilju zaštite i tajnosti podataka,
- c) voditi posebnu evidenciju o podacima i svrsi za koju su podaci iz Registra dati subjektima iz člana 27. stav (3) ovog zakona,
- d) voditi posebnu evidenciju o podacima i svrsi za koju su podaci iz Jedinstvenog registra dati korisnicima iz člana 29. stav (3) ovog zakona,
- e) čuvati podatke na način i u rokovima utvrđenim propisima kojima se uređuje arhivska djelatnost i drugim propisima,
- f) poduzeti mjere protiv neovlaštenog pristupa podacima iz Registra i Jedinstvenog registra i drugih oblika nezakonite obrade, mijenjanja, uništavanja ili prijenosa podataka, kao i mjere protiv zloupotrebe ovih podataka,
- g) pružaočima platnih usluga, elektronskim putem, omogućiti neposredan uvid i preuzimanje podataka koji se vode u Jedinstvenom registru.

(2) Zaposleni u FIA-i koji obrađuju podatke iz Registra i Jedinstvenog registra dužni su čuvati tajnost podataka, pridržavati se utvrđenog načina zaštite podataka i obrađivati podatke pod uslovima koje odredi FIA.

(3) Lica iz stava (2) ovog člana dužna su čuvati tajnost podataka i nakon prestanka radnog odnosa.

Odjeljak B. Registri sefova

Član 32.
(Registar sefova fizičkih lica i Registar sefova poslovnih subjekata)

(1) FIA uspostavlja i vodi Registar sefova fizičkih lica i Registar sefova poslovnih subjekata koje banke stavljaju na upotrebu korisnicima sefa.

(2) Registri iz stava (1) ovog člana ne sadrže podatke o sadržaju sefova.

(3) Banke koje fizičkim licima i poslovnim subjektima stavljaju na upotrebu sefove, dužne su redovno dostavljati FIA-i podatke koje sadrže registri iz stava (1) ovog člana i odgovorne su za njihovu tačnost.

Član 33.
(Registar sefova fizičkih lica)

Registar sefova fizičkih lica je elektronska baza podataka koja sadrži sljedeće podatke o korisnicima sefova:

- a) ime i prezime korisnika sefa,
- b) jedinstveni matični broj korisnika sefa rezidenta,
- c) odgovarajuću identifikacionu oznaku za strano fizičko lice (broj identifikacionog dokumenta, zemlja izdavalac tog dokumenta, datum rođenja i slično) i jedinstveni identifikacioni broj stranog fizičkog lica dodijeljen u skladu sa propisima kojima se uređuje registracija poreznih obveznika,
- d) adresu prebivališta korisnika sefa rezidenta i adresu boravišta, ako posjeduje,
- e) adresu boravišta u Bosni i Hercegovini za korisnika sefa koji je strano fizičko lice i adresu prebivališta u zemlji domicila,
- f) podatke iz tač. a) do e) ovog stava o licima koja su ovlaštena da pristupaju sefu korisnika,
- g) datum zaključenja i prestanka ugovora o sefu, kao i period na koji je taj ugovor zaključen.

Član 34.
(Registar sefova poslovnih subjekata)

Registar sefova poslovnih subjekata je elektronska baza podataka koja sadrži sljedeće podatke o korisnicima sefova:

- a) poslovno ime, odnosno naziv ili skraćeno poslovno ime korisnika sefa,
- b) adresu sjedišta korisnika sefa, a za korisnika koji je strano pravno lice i naziv zemlje domicila,
- c) matični broj i jedinstveni identifikacioni broj korisnika sefa,
- d) ime i prezime lica koja su ovlaštena da pristupaju sefu korisnika,
- e) jedinstveni matični broj lica koja su ovlaštena da pristupaju sefu korisnika, odnosno drugu odgovarajuću identifikacionu oznaku za strano lice (broj identifikacionog dokumenta, zemlja izdavalac tog dokumenta, datum rođenja i slično),
- f) datum zaključenja i prestanka ugovora o sefu, kao i period na koji je taj ugovor zaključen,
- g) druge neophodne podatke koje propiše FIA.

Član 35.
(Tajnost podataka i pristup podacima)

(1) Podaci iz registara sefova nisu javno dostupni i na njih se primjenjuju propisi kojima se uređuju poslovna tajna i zaštita ličnih podataka.

(2) FIA je ovlaštena da, na osnovu podnesenog zahtjeva u pisanoj formi ili elektronskom obliku, podatke iz Registra sefova fizičkih lica i Registra sefova poslovnih subjekata dostavi, odnosno omogući pristup tim podacima:

- a) ako je lice na koje se ovi podaci odnose prethodno dalo pismeni pristanak,
- b) na osnovu odluke ili zahtjeva suda,
- c) za potrebe ministarstva nadležnog za unutrašnje poslove, organa nadležnog za borbu protiv organizovanog kriminala i korupcije i organa nadležnog za sprječavanje pranja novca i finansiranja terorističkih aktivnosti, u skladu sa propisima,
- d) u vezi sa postupkom izvršenja ili osiguranja na imovini korisnika sefa, na osnovu zahtjeva suda ili drugog nadležnog organa.

(3) Na obaveze FIA-e u pogledu prikupljanja, obrade i zaštite podataka iz Registra sefova fizičkih lica i Registra sefova poslovnih subjekata primjenjuju se odredbe ovog zakona koje uređuju Registar i Jedinствeni registar.

(4) FIA, uz prethodnu saglasnost Ministra, propisuje način vođenja Registra sefova fizičkih lica i Registra sefova poslovnih subjekata, način dostavljanja podataka, kao i davanja i korištenja podataka iz ovih registara.

POGLAVLJE III. PLAĆANJE I PRINUDNA NAPLATA SA RAČUNA

Odjeljak A. Plaćanja

Član 36. (Plaćanja)

- (1) Načini plaćanja su: bezgotovinsko, gotovinsko i obračunsko.
- (2) Nalog za plaćanje je instrukcija koju platilac ili primalac plaćanja podnosi pružaocu platnih usluga kojom se traži izvršavanje platne transakcije.
- (3) Bezgotovinsko plaćanje je prijenos sredstava s računa platioca na račun primaoca.
- (4) Gotovinsko plaćanje je direktna predaja gotovog novca između imalaca, uplata gotovog novca na račun za plaćanje i isplata gotovog novca s računa za plaćanje u skladu s propisom iz stava (8) ovog člana.
- (5) Obračunsko plaćanje je namirenje međusobnih novčanih obaveza i potraživanja između imalaca bez upotrebe novca.
- (6) Zabranjeno je poslovnim subjektima da izmiruju svoje obaveze gotovim novcem ako imaju blokirane račune u skladu sa ovim zakonom ili ako je u suprotnosti sa propisom iz stava (8) ovog člana, a gotov novac ostvaren obavljanjem registrovane djelatnosti dužni su položiti na tekuće račune u bankama u skladu sa propisom iz stava (8) ovog člana.
- (7) Poslovni subjekt ne može obavljati obračunsko plaćanje iz stava (5) ovog zakona ako je u trenutku plaćanja blokiran bilo koji od tekućih računa po osnovu naloga za prinudnu naplatu.
- (8) Vlada će, na prijedlog Ministra, podzakonskim aktom propisati uslove i način plaćanja gotovim novcem.

Član 37. (Izvršavanje naloga za plaćanje)

Pružaoци platnih usluga izvršavaju naloge za plaćanje u skladu sa ovim zakonom i propisom o platnim uslugama.

Odjeljak B. Prinudna naplata

Član 38. (Prinudna naplata)

- (1) Izuzetno od člana 37. ovog zakona, nalog za plaćanje u korist računa primaoca, a na teret računa platioca mogu dati:
 - a) povjerioci - na osnovu naplate dospjelih vrijednosnih papira i dospjelih instrumenata osiguranja plaćanja i ostalih propisanih ili ugovorenih ovlaštenja,
 - b) organi, institucije i pravna lica na osnovu zakonskih ovlaštenja,
 - c) banke, na osnovu sudskih odluka i drugih izvršnih isprava te zakonskih ovlaštenja.
- (2) Nalozi za prinudnu naplatu iz stava (1) ovog člana trebaju glasiti na tekući račun koji je platilac, u skladu s članom 23. stav (3) ovog zakona, odredio za izvršenje tih naloga.
- (3) Osim naloga za plaćanje iz stava (1) tačke c) ovog člana, banka može dati nalog za plaćanje na teret tekućeg računa platioca na osnovu ugovornih ovlaštenja dobivenih od platioca.
- (4) Zabranjeno je platiocu obavljanje platnih usluga sa računa koje ima kod pružalaca platnih usluga, a koji su blokirani na osnovu naloga za prinudnu naplatu.
- (5) U slučaju nelikvidnosti (poslovni subjekt je nelikvidan ako na tekućem računu nema dovoljno sredstava za isplatu svih naloga, odnosno osnova za naplatu na dan dospeljeća) nalogodavac je dužan poštovati redosljed prioriteta.

Član 39. (Redosljed prioriteta)

- (1) Banka naloge za prinudnu naplatu evidentira i izvršava, nakon osiguranja pokrića, prema sljedećem redosljedu prioriteta:
 - a) nalozi za plaćanje i osnove za naplatu carina i carinskih dažbina, posebnih poreza-akciza, poreza na dodanu vrijednost, poreza na dohodak i drugih poreza, po posebnim propisima - prema vremenu prijema;
 - b) nalozi za plaćanje i osnove za naplatu doprinosa iz plaća i na plaće - prema vremenu prijema;
 - c) nalozi za plaćanje i osnove za naplatu ostalih javnih prihoda, po posebnim propisima - prema vremenu prijema;
 - d) nalozi za plaćanje i osnove za naplatu po drugim izvršnim odlukama organa uprave i sudskih organa - prema vremenu prijema;
 - e) nalozi povjerioca na osnovu dospjelih vrijednosnih papira, mjenica ili ovlaštenja koje je dužnik dao svojoj banci i svom povjeriocu - prema vremenu prijema;
 - f) ostali osnovi za naplatu.
- (2) Nalozi za prinudnu naplatu iz sljedećeg reda prioriteta mogu se izvršavati tek po izvršenju svih naloga za prinudnu naplatu iz prethodnog reda prioriteta, uključujući i naloge za prinudnu naplatu koji su primljeni u međuvremenu.

- (3) Banka koja vodi glavni račun poslovnog subjekta dužna je voditi evidenciju o redoslijedu prijema naloga za prinudnu naplatu istog prioriteta iz stava (1) ovog člana prema danu i satu njihovog prijema i da ih po tom redoslijedu izvršava.
- (4) Banka koja vodi glavni račun poslovnog subjekta obavještava povjerioca, na njegov pisani zahtjev, o redoslijedu naplate njegovog potraživanja.
- (5) Podnesene naloge poslovnog subjekta koji se ne odnose na prinudnu naplatu banke ne mogu izvršavati prije izvršenja svih naloga za prinudnu naplatu iz stava (1) ovog člana i deblokade svih računa poslovnog subjekta.

Član 40.
(Izvršavanje naloga za prinudnu naplatu)

- (1) Banka koja vodi glavni račun poslovnog subjekta izvršava naloge za prinudnu naplatu, date u skladu sa članom 38. st. (1) i (2) ovog zakona, do iznosa određenog u nalogu iz svih sredstava na računima poslovnog subjekta u konvertibilnim markama koji su otvoreni u toj banci, osim sredstava koja se nalaze na računima banaka koje se nalaze u postupku privremene uprave i likvidacije i osim sredstava koja su izuzeta od izvršenja po drugom osnovu.
- (2) U nedostatku sredstava za potpuno izvršenje naloga za plaćanje iz stava (1) ovog člana, banka koja vodi glavni račun poslovnog subjekta naloge izvršava djelimično. U periodu djelimičnog izvršenja naloga za prinudnu naplatu banka koja vodi glavni račun drži blokirane sve račune u konvertibilnim markama i devizne račune poslovnog subjekta otvorene u toj banci.

Član 41.
(Zahtjev pružaocima platnih usluga)

- (1) Ako na računima platioca nema dovoljno sredstava za izvršenje naloga iz člana 38. stav (5) ovog zakona, a platilac ima otvorene račune za plaćanje kod drugih pružalaca platnih usluga, banka koja vodi glavni račun platioca na koji glase nalozi za plaćanje upućuje zahtjev elektronskim putem drugim pružaocima platnih usluga isti dan, u slučaju opravdane spriječenosti banke najkasnije idući radni dan, za blokadu svih računa u konvertibilnim markama i deviznih računa platioca koji se vode u tim pružaocima platnih usluga.
- (2) Pružalac platnih usluga dužan je postupiti po zahtjevu banke iz stava (1) ovog člana i blokirati sve račune za plaćanje platioca koji se vode kod njega, do obavijesti banke iz stava (1) ovog člana o prestanku blokade računa. Podatke o blokadi računa poslovnog subjekta pružalac platnih usluga dužan je dostaviti u Jedinstveni registar.
- (3) Sredstva poslovnog subjekta na računima organizacionih dijelova i sredstva na računima za posebne namjene koriste se za izvršenje naloga za prinudnu naplatu, osim sredstava banaka koje su u postupku privremene uprave i likvidacije, sredstava koja su ugovorom o kreditu određena kao osiguranje konkretnog kredita i sredstava koja su izuzeta od izvršenja po drugim osnovama.
- (4) Pružalac platnih usluga neće izvršiti prijenos sredstava s blokiranih računa učesnika ako su ta sredstva izuzeta od izvršenja propisom koji uređuje izvršni postupak ili drugim propisima.

- (5) Računi javnih prihoda na koje se vrše uplate javnih prihoda na ime Bosne i Hercegovine, Federacije, kantona, gradova i općina s kojih se vrši raspodjela na račune korisnika javnih prihoda ne mogu se blokirati i sredstva na ovim računima izuzimaju se od izvršenja naloga za prinudnu naplatu.
- (6) Ministar podzakonskim aktom propisuje način i postupak izvršenja naloga za plaćanje iz ovog člana.

Član 42.
(Prijenos sredstava s blokiranih računa)

- (1) Platilac je dužan odmah ili prvi radni dan nakon primitka obavijesti od banke o blokadi tekućeg računa dati nalog za prijenos sredstava s blokiranih računa na njegov glavni račun na kojem su evidentirani neizvršeni nalozi za prinudnu naplatu ili dati nalog za rezervisanje sredstava do potpunog okončanja izvršnog postupka.
- (2) Ako platilac ne postupi u skladu sa stavom (1) ovog člana, pružaoci platnih usluga kod kojih isti ima blokirane račune ispostaviti će naloge za prijenos sredstava s blokiranih računa za plaćanje u konvertibilnim markama na glavni račun u visini iznosa blokade računa.
- (3) Ako na računima za plaćanje platioca u konvertibilnim markama nema dovoljno sredstava za izvršenje naloga za prinudnu naplatu, banke će ispostaviti naloge za prijenos sredstava u visini iznosa blokade računa sa svih blokiranih deviznih i računa za posebne namjene otvorenih u tim bankama, osim ako drugim propisom nije drugačije određeno.
- (4) Banka koja vodi glavni račun platioca dužna je odmah, nakon potpunog izvršenja naloga za prinudnu naplatu, obavijestiti druge pružaoce platnih usluga o tom izvršenju, radi deblokade sredstava poslovnog subjekta na računima za plaćanje kod tih pružalaca platnih usluga.
- (5) Nakon prijema obavještenja o prestanku blokade računa platioca iz stava (4) ovog člana, banka iz stava (3) ovog člana dužna je deblokirati sve njegove račune i promijeniti oznaku o blokadi računa u evidenciji računa poslovnih subjekata koji vodi banka i Jedinstveni registar.

Član 43.
(Nalog za prinudnu naplatu koji glasi na teret drugog računa platioca)

- (1) Ako nalog za prinudnu naplatu glasi na teret drugog tekućeg računa platioca, a ne na teret glavnog računa platioca, banka koja vodi taj račun izvršava naloge za plaćanje po navedenim osnovama do iznosa pokrića na računima platioca koji se vode u toj banci u skladu s članom 39. ovog zakona. Neizvršene naloge za prinudnu naplatu banka dostavlja isti dan, u slučaju opravdane spriječenosti banke najkasnije idući radni dan, na izvršenje banci koja vodi glavni račun platioca i račun ostaje blokirao do prijema obavijesti banke kod koje je otvoren glavni račun da su izmirene obaveze po osnovu prinudne naplate.
- (2) Banka, koja vodi glavni račun platioca, primljene naloge za prinudnu naplatu izvršava na osnovu isprava iz člana 38. stav (1) tačka c), člana 38. stav (5), te čl. 39. i 40. ovog zakona.

- (3) Banka, koja ima otvorene nerezidentne račune iz člana 6. stav (7) ovog zakona, dužna je primljene naloge za prinudnu naplatu izvršavati u skladu sa članom 38. stav (5) i čl. 39. i 40. ovog zakona, a u slučaju nedostatka sredstava na ovim računima za potpuno izvršenje naloga, ova i druge banke dužne su postupati na način propisan čl. 41. do 44. ovog zakona.

Član 44. (Ugovor o oročenju)

- (1) Ako poslovni subjekt na dan isteka ugovora o oročenju njegovih sredstava kod banke ima na tekućem računu evidentirane nenamirene obaveze iz člana 38. st. (1) i (2) ovog zakona, banka ne može produžiti ugovor o oročenju sredstava.
- (2) U ugovoru o oročenim sredstvima zaključenim sa imaoцем, banka je dužna unijeti odredbu o raskidu ugovora i obavezi prijenosa oročenih sredstava, zajedno s pripadajućim kamatama do momenta raskida ugovora, na glavni račun poslovnog subjekta radi izvršenja naloga za prinudnu naplatu u skladu s ovim zakonom.
- (3) U slučaju da na računima u konvertibilnim markama, devizama i računima za posebne namjene nema dovoljno sredstava za izvršenje naloga za prinudnu naplatu banka kod koje se vode oročena sredstva tog imaoца koji ima blokirane račune obavezna je u skladu sa propisom kojim se uređuje izvršni postupak, raskinuti ugovor i oročena sredstva do visine blokade doznačiti na glavni račun imaoца radi izvršenja naloga za prinudnu naplatu iz člana 38. st. (1) i (2) ovog zakona, isključivo i samo po zahtjevu banke kod koje se vodi glavni račun.
- (4) Banka iz stava (2) ovog člana obavezna je na glavni račun doznačiti i iznos dospjelih kamata, koje prema ugovoru o oročenim sredstvima pripadaju imaoцу do momenta raskida ugovora, radi izvršenja naloga za prinudnu naplatu u skladu sa ovim zakonom.
- (5) Poslovni subjekt u vezi sa st. (2) i (3) ovog člana može, radi izvršenja naloga za prinudnu naplatu, raskinuti ugovor o oročenim sredstvima zaključen s bankom.
- (6) Izuzetno, ugovori o namjenski oročenim sredstvima za osiguranje plasmana su izuzeti iz postupanja po nalogima prinudne naplate.

Član 45. (Rokovi čuvanja)

Pružalac platnih usluga dužan je čuvati naloge za plaćanje i druge dokumente na osnovu kojih su evidentirane promjene na računima za plaćanje, u izvornom obliku ili na drugi prikladan način i u rokovima koji su utvrđeni propisima o arhivskoj djelatnosti, računovodstvu i reviziji i propisima o sprječavanju pranja novca i finansiranja terorističkih aktivnosti.

Član 46. (Odgovornost u postupku prinudne naplate)

- (1) Pružaoci platnih usluga i imaoци odgovorni su i snose štetu koja može nastati obavljanjem poslova povezanih sa računom za plaćanje u skladu sa ovim zakonom i propisom o platnim uslugama.
- (2) Pružalac platnih usluga je odgovoran i snosi štetu:

- a) ako nalog za plaćanje ne izvrši u skladu s propisanim redoslijedom plaćanja,
b) ako pogrešno tereti ili odobri račun kod pružaoca platnih usluga,
c) ako ne postupi u skladu s odredbama čl. 41. do 44. ovog zakona.

- (3) Nalogodavac je odgovoran i snosi štetu:
- a) ako je nalog za plaćanje, zbog nepostojanja računa navedenog u nalogu, odbijen,
b) ako nalog za plaćanje nije izvršen na dan valute zbog nedostatka sredstava na njegovim računima,
c) ako nalog za plaćanje nije izvršen na dan valute radi podnošenja pružaocu platnih usluga nakon isteka propisanog roka.

POGLAVLJE IV. NAKNADE I UPOREDIVOST NAKNADA

Član 47. (Informacije o naknadama i pojmovnik)

- (1) Pružalac platnih usluga dužan je fizičkom licu dati informacioni dokument o naknadama (u daljem tekstu: informacioni dokument) za najreprezentativnije usluge povezane s računom za plaćanje iz liste iz stava (7) ovog člana u pisanom obliku ili drugom trajnom nosaču podataka, prije sklapanja ugovora o računu za plaćanje sa korisnikom platnih usluga, pravovremeno, kako bi isti imao vremena za donošenje odluke o sklapanju ugovora.
- (2) Informacioni dokument mora:
- a) imati naziv „Informacioni dokument o naknadama“,
b) sadržavati nazive svih usluga iz liste najreprezentativnijih usluga iz stava (7) ovog člana i naknade za one od tih usluga koje pruža, a ako ne pruža pojedinu od tih usluga, naznaku da tu uslugu ne pruža,
c) biti kratak i samostalan dokument, napisan jasno, lako razumljivim riječima te slovima lako čitljive veličine,
d) biti tačan i ne smije biti obmanjujući,
e) biti jednako razumljiv kada je štampan ili fotokopiran u crno-bijeloj verziji, ako je izvorna verzija bila u boji,
f) imati izjavu o tome da sadržava naknade za najreprezentativnije usluge obuhvaćene listom najreprezentativnijih usluga iz stava (7) ovog člana i da su detaljne predugovorne i ugovorne informacije o svim uslugama, uključujući i naknade za usluge koje nisu na toj listi, navedene u drugim dokumentima,
g) biti napisan na jednom od jezika koji su u službenoj upotrebi u Bosni i Hercegovini,
h) sadržavati visinu naknade u konvertibilnim markama, a u drugoj valuti samo ako je tako ugovoreno između pružaoca platnih usluga i fizičkih lica, u skladu s propisima kojima se uređuje devizno poslovanje i plaćanje,
i) biti u formatu i sa strukturom određenom aktom Agencije iz stava (7) ovog člana.
- (3) Ako se jedna ili više usluga nudi kao dio paketa usluga povezanih s računom za plaćanje, informacioni dokument mora sadržavati naknadu za cijeli paket, usluge uključene u paket i njihovu količinu, kao i dodatnu naknadu za bilo koju uslugu koja prelazi količinu obuhvaćenu naknadom za paket.
- (4) Pružalac platnih usluga dužan je učiniti dostupnim fizičkom licu pojmovnik koji je sastavni dio informacionog dokumenta, a koji mora obuhvatiti barem nazive i definicije usluga iz liste

najreprezentativnijih usluga iz stava (7) ovog člana, mora biti napisan jasno i lako razumljivim riječima i slovima lako čitljive veličine, ne smije biti obmanjujući te mora biti na jednom od jezika koji su u službenoj upotrebi u Bosni i Hercegovini.

- (5) Informacioni dokument mora u svakom trenutku biti dostupan fizičkom licu, uključujući i fizičko lice koji nije korisnik tog pružaoca platnih usluga i to u elektronskom obliku na internet stranicama pružaoca platnih usluga i prostorijama pružaoca platnih usluga kojima korisnik ima pristup.
- (6) Na zahtjev fizičkog lica pružalac platnih usluga dužan je tom fizičkom licu besplatno dati informacije o naknadama u pisanom obliku ili na drugom trajnom nosaču podataka.
- (7) Agencija će propisati formu i listu od najmanje 10, a najviše 20 najreprezentativnijih usluga povezanih s računom za plaćanje s nazivima i definicijama usluga koje fizička lica najčešće koriste, koje fizička lica izlažu najvećem ukupnom ili pojedinačnom trošku te koje podliježu naknadi najmanje jednog pružaoca platnih usluga u Federaciji.
- (8) Listu najreprezentativnijih usluga iz stava (7) ovog člana Agencija utvrđuje na način da koristi, u mjeri u kojoj je to moguće, terminologiju EU propisa u ovoj oblasti.
- (9) Agencija će propisati sadržaj i formu informacionog dokumenta te će najmanje svake dvije godine analizirati i po potrebi ažurirati listu najreprezentativnijih usluga iz stava (7) ovog člana.

Član 48. (Izveštaj o naknadama)

- (1) Ne dovodeći u pitanje odredbe propisa kojima se uređuju platne usluge i zaštita korisnika finansijskih usluga, pružalac platnih usluga dužan je za izvršene usluge povezane s računom za plaćanje najmanje jednom godišnje besplatno staviti na raspolaganje elektronskim putem, odnosno na drugi način učiniti dostupnim imaocu izvještaj o svim obračunatim naknadama i kamatama iz stava (4) ovog člana.
- (2) Imalac, pri ugovaranju načina davanja izvještaja o naknadama iz stava (1) ovog člana, ima pravo na izbor načina na koji će primiti taj izvještaj, uključujući i prijem izvještaja elektronskim putem.
- (3) Nezavisno od ugovorenog načina davanja izvještaja, pružalac platnih usluga dužan je imaocu, na njegov zahtjev, dostaviti izvještaj o naknadama u pisanom obliku.
- (4) Izvještaj o naknadama, reguliranim ugovorom iz člana 6. stav (1) ovog zakona može biti izrađen kao samostalni dokument ili kao prilog izvoda računa za plaćanje i mora sadržavati najmanje sljedeće informacije:
 - a) naknadu obračunatu za svaku uslugu i informaciju o tome koliko je puta ta usluga korištena u toku odnosnog perioda, a ako je više usluga obuhvaćeno paketom, naknadu koja je obračunata za cijeli paket, informaciju o tome koliko je puta naknada za paket obračunata u odnosnom periodu te dodatnu naknadu koja je obračunata za bilo koju uslugu koja prelazi količinu obuhvaćenu naknadom za paket,
 - b) ukupne iznose svih naknada obračunatih u toku odnosnog perioda za svaku uslugu, za svaki pruženi paket usluga i za usluge koje prelaze količinu obuhvaćenu naknadom za paket,
 - c) kamatnu stopu na ugovoreno prekoračenje ako se primjenjuje na račun za plaćanje te ukupni iznos zaračunatih kamata na ugovoreno prekoračenje u odnosnom periodu,

- d) pasivnu kamatnu stopu koja se primjenjuje na račun za plaćanje te ukupni iznos kamata koje je imalac ostvario u odnosnom periodu,
- e) ukupni iznos svih obračunatih naknada za sve usluge povezane sa računom za plaćanje pružene u toku odnosnog perioda.

(5) Izvještaj o naknadama mora:

- a) imati naziv „Izvještaj o naknadama“,
- b) biti napisan jasno, lako razumljivim riječima te slovima lako čitljive veličine,
- c) biti tačan i ne smije biti obmanjujući,
- d) biti napisan na jednom od jezika koji su u službenoj upotrebi u Bosni i Hercegovini,
- e) sadržavati naknade u konvertibilnim markama, a u drugoj valuti samo ako je to ugovoreno između pružaoca platnih usluga i imaoca u skladu s propisima kojima se uređuje devizno poslovanje i plaćanje,
- f) biti u formatu određenom aktom Agencija iz stava (6) ovog člana.

(6) Agencija propisuje oblik i sadržaj izvještaja o naknadama.

Član 49. (Informacije za korisnike platnih usluga)

- (1) Pružalac platnih usluga dužan je u svojim predugovornim i promotivnim informacijama namijenjenim korisniku platnih usluga, kao i u ugovoru koji sklapa s imaocem koristiti pojmove iz liste najreprezentativnijih usluga iz člana 47. stav (7) ovog zakona.
- (2) U informacijama iz stava (1) ovog člana pružalac platnih usluga za označavanje svojih usluga može, uz pojmove iz liste najreprezentativnijih usluga iz člana 47. stav (7) ovog zakona, koristiti i svoje nazive.
- (3) Pružalac platnih usluga može u informacionom dokumentu iz člana 47. ovog zakona i izvještaju o naknadama iz člana 48. ovog zakona, uz pojmove iz liste najreprezentativnijih usluga iz člana 47. stav (7) ovog zakona, koristiti i svoje nazive usluga pod uslovom da te nazive koristi kao sekundarne oznake za usluge iz te liste i da korisnik može prepoznati usluge definisane u toj listi.

Član 50. (Uporedni prikaz naknada)

- (1) Agencija na svojoj internet stranici objavljuje uporedni prikaz naknada koje pružaoci platnih usluga naplaćuju imaocima za usluge navedene u listi najreprezentativnijih usluga iz člana 47. stav (7) ovog zakona.
- (2) Objava uporednog prikaza naknada iz stava (1) ovog člana sadrži:
 - a) jasne i objektivne kriterije na osnovu kojih se provodi upoređivanje naknada,
 - b) ažurne informacije napisane jasno, lako razumljivim riječima, korištenjem pojmova iz liste najreprezentativnijih usluga iz člana 47. stav (7) ovog zakona te oznaku vremena posljednjeg ažuriranja,
 - c) jasan pregled naknada koje naplaćuju pružaoci platnih usluga koji posluju na teritoriji Federacije,
 - d) uputstvo za postupanje imaocima u slučaju da primijete netačne informacije u objavi uporednog prikaza naknada.

(3) Pružalac platnih usluga dužan je na svojoj internet stranici osigurati poveznicu s internet stranicom iz stava (1) ovog člana.

(4) Agencija će propisati podatke koje su joj pružaoci platnih usluga dužni dostaviti za potrebe objave uporednog prikaza naknada iz stava (1) ovog člana te način i rokove za dostavu tih podataka, kao i postupak za prijavljivanje Agenciji netačnih informacija o objavljenim naknadama.

Član 51. (Primjena odredbi)

Odredbe čl. 47. do 50. ovog zakona ne isključuju obavezu pružaoca platnih usluga da pruži informacije koje je dužan pružiti u skladu sa odredbama propisa o platnim uslugama i propisa o zaštiti korisnika finansijskih usluga.

Član 52. (Naknada za pružanje platnih usluga)

(1) Pružaoci platnih usluga mogu naplatiti naknadu za pružanje platnih usluga, osim usluga koje su ovim i drugim zakonima označene kao besplatne.

(2) Naknada iz stava (1) ovog člana mora biti ugovorena, primjerena i u skladu sa stvarnim troškovima pružalaca platnih usluga.

(3) Međubankarska naknada kod transakcije debitnom karticom ne može biti viša od 0,2% vrijednosti izvršene transakcije, a međubankarska naknada kod transakcije kreditnom karticom ne može biti viša od 0,3% vrijednosti izvršene transakcije.

(4) Pružalac platnih usluga ne može naplatiti niti ponuditi međubankarsku naknadu suprotno stavu (3) ovog člana.

(5) Odredbe stava (3) ovog člana ne primjenjuju se na:

a) platne transakcije na osnovu platnih kartica koje se odnose na isplatu gotovog novca na bankomatima ili na šalterima pružalaca platnih usluga ili na prodajnim mjestima kod primalaca plaćanja,

b) platne transakcije na osnovu poslovnih kartica.

(6) Poslovna kartica iz stava (5) tačka b) ovog člana znači svaki platni instrument izdat na osnovu kartica poslovnim subjektima čije se korištenje ograničava na poslovne troškove, pri čemu plaćanja izvršena takvim karticama terete direktno tekući račun poslovnih subjekata.

(7) Pružalac platnih usluga dužan je, u poslovnim jedinicama i na svojoj internet stranici, objaviti cjenovnik po kojem naplaćuje naknade za pružanje platnih usluga i dostaviti elektronskim putem Agenciji u roku od tri radna dana od dana početka primjene tarife, te na svojoj internet stranici osigurati poveznicu s internet stranicom iz stava (8) ovog člana.

(8) Agencija na svojoj internet stranici objavljuje uporedni prikaz naknada koje pružaoci platnih usluga naplaćuju poslovnim subjektima za platne usluge.

(9) Objava uporednog prikaza naknada iz stava (8) ovog člana sadrži:

- a) jasne i objektivne kriterije na osnovu kojih se provodi upoređivanje naknada,
- b) ažurne informacije napisane jasno, lako razumljivim riječima, te oznaku vremena posljednjeg ažuriranja,
- c) potpuni pregled tržišta ili njegovog znatnog dijela s jasnom naznakom, prije prikaza samog upoređivanja naknada, da objava uporednog prikaza naknada nije potpuni pregled tržišta,
- d) uputstvo o načinu prijave netačnih informacija u objavi uporednog prikaza naknada.

(10) Agencija propisuje sadržaj, rokove i način dostavljanja podataka iz st. (3) i (7) ovog člana.

POGLAVLJE V. IZVJEŠTAVANJE

Član 53. (Izvještaj o stanju i promjenama po računu)

(1) Pružaoci platnih usluga su obavezni staviti na raspolaganje imaocima izvještaje o svim promjenama i stanju računa u skladu sa načinom i uslovima propisanim ugovorom o otvaranju i vođenju računa.

(2) Ako rok za dostavu izvještaja nije ugovoren, pružaoci platnih usluga dostavljaju ili stavljaju na raspolaganje imaocima izvještaje o stanju i promjenama po računima s podacima o izvršenim plaćanjima, najkasnije idući radni dan od dana nastanka promjene na računu.

(3) Podaci o promjenama i stanju na računima imaoca predstavljaju poslovnu tajnu, kao i drugi podaci za koje je ovim i drugim zakonom utvrđeno da su tajni.

Član 54. (Ograničenja)

(1) Pružaocima platnih usluga je zabranjeno da učesnicima naplaćuju pružene informacije iz člana 6. stav (3) i člana 7. stav (3) ovog zakona.

(2) Pružaocima platnih usluga i imaocima je dozvoljeno da se dogovore o troškovima za dodatno ili češće dostavljanje informacija ili njihov prijenos putem kanala komunikacije u skladu sa propisom o zaštiti korisnika finansijskih usluga.

(3) Troškovi pružalaca platnih usluga za informacije iz stava (2) ovog člana moraju biti primjereni i u skladu sa stvarnim troškovima pružalaca platnih usluga.

Član 55. (Sprječavanje pranja novca i finansiranja terorističkih aktivnosti)

Pružaoци platnih usluga i imaoci su dužni u vezi sa poslovima povezanim sa računima za plaćanje postupati u skladu sa propisom o sprječavanju pranja novca, finansiranja terorističkih aktivnosti i finansiranja širenja oružja za masovno uništenje.

POGLAVLJE VI. NADZOR

Član 56. (Nadzor)

- (1) Nadzor nad obavljanjem poslova povezanim sa računima za plaćanje pružalaca platnih usluga vrši Agencija i drugi kontrolni organi u skladu sa odredbama ovog zakona, propisa o platnim uslugama i posebnih propisa kojima se uređuje poslovanje i nadležnost kontrolnih organa i pružalaca platnih usluga.
- (2) U okviru svoje nadležnosti, Agencija i kontrolni organi sarađuju u vršenju nadzora obavljanja poslova povezanih sa računima za plaćanje i u primjeni ovog zakona i drugih propisa.

Član 57. (Mjere)

U provođenju nadzora i primjeni ovog zakona, Agencija u skladu sa ovim zakonom i propisima kojima se uređuje poslovanje pružalaca platnih usluga:

- a) zahtijeva od pružalaca platnih usluga da pruže sve informacije potrebne za praćenje usklađenosti obavljanja poslova povezanih sa računima za plaćanje s ovim zakonom i drugim propisima,
- b) obavlja direktan nadzor pružalaca platnih usluga i njihovih organizacionih dijelova,
- c) daje preporuke i smjernice i po potrebi obavezujuće naloge,
- d) poduzima mjere i pokreće postupke protiv pružalaca platnih usluga u slučaju nepridržavanja odredbi ovog zakona,
- e) privremeno obustavi ili oduzme pružaocu platnih usluga dozvolu za obavljanje platnih usluga ako ne obavlja poslovanje u skladu sa ovim zakonom, propisima o platnim uslugama i propisima Agencije.

Član 58. (Saradnja i oblici saradnje)

- (1) Agencija u svom radu sarađuje i razmjenjuje neophodne informacije sa nadležnim sudovima, tužilaštvima ili licima koja rade po njihovim nalogima, na osnovu odluke ili zahtjeva nadležnog suda, odnosno tužilaštva, ukoliko su takvi podaci potrebni za postupke koje provode u okviru svojih nadležnosti, a u skladu sa propisima koji uređuju njihov rad.
- (2) Dostavljanje informacija i obavještenja iz stava (1) ovog člana ne smatra se povredom tajnosti podataka.
- (3) Nadležni organ dužan je informacije i obavještenja, koje primi u skladu sa stavom (1) ovog člana, čuvati kao povjerljive i može ih koristiti samo u svrhu za koju su mu dostavljeni i učiniti dostupnim trećim licima samo uz saglasnost nadležnog organa koji ih je dostavio.
- (4) Agencija može zaključiti sporazum sa jednim ili više nadležnih tijela država članica ili drugih država radi obavljanja nadzora nad poslovanjem izdavalaca i uspostavljati druge oblike saradnje.
- (5) Dostavljanje informacija i obavještenja kroz oblike saradnje iz stava (4) ovog člana ne smatra se povredom tajnosti podataka.

POGLAVLJE VII. KAZNE NE ODREDBE

Član 59. (Prekršaji banaka)

- (1) Novčanom kaznom u iznosu od 20.000 KM do 40.000 KM kaznit će se za prekršaj banka ako:
 - a) ne otvori tekući račun u skladu sa članom 7. st. (1), (2) i (3) ovog zakona,
 - b) postupi suprotno odredbi člana 7. stav (8) ovog zakona,
 - c) na zahtjev fizičkog lica iz člana 9. stav (2) ovog zakona ne omogući otvaranje i korištenje osnovnog računa i/ili ne postupi u skladu sa članom 9. st. (5) do (11) ovog zakona,
 - d) međusobno ne sarađuje u postupku provjere da li fizičko lice ima otvoren račun kod druge banke u skladu sa članom 9. st. (6) i (12) ovog zakona,
 - e) naknade u vezi sa osnovnim računom naplaćuje više nego što je propisano ili ne pruža usluge u skladu sa članom 10. ovog zakona,
 - f) raskine ugovor o osnovnom računu suprotno članu 11. ovog zakona,
 - g) poslovnom subjektu otvori račune i vodi evidenciju suprotno članu 22. ovog zakona,
 - h) poslovnom subjektu, čiji su računi blokirani, izvrši plaćanja i otvara tekuće račune suprotno članu 23. stav (5) i članu 38. stav (4) ovog zakona,
 - i) poslovnom subjektu otvori glavni račun suprotno članu 24. stav (1) ovog zakona,
 - j) imaocu zatvori račune suprotno čl. 25. i 26. ovog zakona,
 - k) ne dostavlja podatke u Registar sefova fizičkih lica i Registar sefova poslovnih subjekata u skladu sa članom 32. stav (3) ovog zakona,
 - l) ne daje naloge za plaćanje s računa poslovnih subjekata propisane članom 38. stav (1) tačka c) ovog zakona,
 - m) ne izvrši naloge za prinudnu naplatu u skladu sa članom 38. stav (5), članom 39. stav (1) i članom 40. ovog zakona,
 - n) izvrši naloge za plaćanje, a koji se ne odnose na prinudnu naplatu, suprotno članu 39. stav (5) ovog zakona,
 - o) ne postupi u skladu s članom 41. i članom 42. st. (2) do (5) ovog zakona,
 - p) sa blokiranih računa izvrši prijenos sredstava, koja su izuzeta od izvršenja, u skladu sa članom 42. stav (4) ovog zakona,
 - r) ne izvrši naloge za prinudnu naplatu u skladu sa članom 43. ovog zakona,
 - s) ne razroči oročena sredstva poslovnog subjekta u skladu sa članom 44. st. (2) do (4) ovog zakona,
 - t) naplati ili ponudi međubankarsku naknadu suprotno članu 52. st. (3) i (4) ovog zakona.
- (2) Za prekršaje iz stava (1) ovog člana kaznit će se i odgovorno lice u banci novčanom kaznom u iznosu od 1.500 KM do 3.000 KM.
- (3) Novčanom kaznom od 10.000 KM do 20.000 KM za prekršaj kaznit će se banka ako:
 - a) izmijeni odredbe ugovora suprotno članu 7. stav (4) ovog zakona,
 - b) povjerioca, na njegov zahtjev, ne obavijesti o redosljedu naplate njegovog potraživanja u skladu sa članom 39. stav (4) ovog zakona,
 - c) imaocu - fizičkom licu ne da informacioni dokument o naknadama u skladu s članom 47. stav (1) ovog zakona,
 - d) informacioni dokument o naknadama ne sastavi u skladu s članom 47. st. (2) i (3) ovog zakona,
 - e) imaocu - fizičkom licu ne učini dostupnim informacioni dokument o naknadama u skladu s članom 47. stav (6) ovog zakona,

f) na zahtjev imaoca – fizičkog lica ne da korisniku informacioni dokument o naknadama i pojmovnik besplatno u pisanom obliku ili drugom trajnom nosaču podataka u skladu s članom 47. stav (7) ovog zakona.

(4) Za prekršaje iz stava (3) ovog člana kaznit će se i odgovorno lice u banci novčanom kaznom u iznosu od 1.000 KM do 2.000 KM.

Član 60.

(Prekršaji pružalaca platnih usluga)

(1) Novčanom kaznom u iznosu od 10.000 KM do 20.000 KM kaznit će se za prekršaj pružalac platnih usluga ako:

- a) prije zaključenja ugovora ne informira imaoca o svim bitnim uslovima korištenja usluge u skladu sa članom 6. stav (3) ovog zakona,
- b) otvori račune suprotno članu 6. stav (8) ovog zakona,
- c) postupi suprotno članu 7. stav (7) ovog zakona,
- d) odbije pružiti uslugu prebacivanja računa za plaćanje u istoj valuti fizičkom licu koje otvori ili ima račun za plaćanje kod banke koja se nalazi na teritoriji Federacije suprotno članu 12. ovog zakona,
- e) kao pružalac platnih usluga - prenosilac, ne prenese pružaocu platnih usluga - primaocu informacije i novčana sredstva u skladu sa članom 13. stav (2) ovog zakona,
- f) kao pružalac platnih usluga - primalac, ne započne sa poduzimanjem radnji koje se odnose na prebacivanje računa za plaćanje po prijemu ovlaštenja fizičkog lica za prebacivanje računa za plaćanje u skladu sa članom 14. stav (1) ovog zakona,
- g) kao pružalac platnih usluga - primalac, u roku od dva radna dana od dana prijema ovlaštenja, ne podnese zahtjev pružaocu platnih usluga - prenosiocu da u skladu sa tim ovlaštenjem izvrši radnje u skladu sa članom 15. ovog zakona,
- h) kao pružalac platnih usluga - prenosilac, po prijemu zahtjeva u skladu sa članom 15. ovog zakona od pružaoca platnih usluga - primaoca, ne izvrši radnje u skladu sa članom 16. stav (1) ovog zakona,
- i) kao pružalac platnih usluga - prenosilac blokira platni instrument prije dana utvrđenog u ovlaštenju fizičkog lica suprotno članu 16. stav (2) ovog zakona,
- j) kao pružalac platnih usluga - primalac, u roku od pet radnih dana od dana prijema informacija zatraženih od pružaoca platnih usluga - prenosioca, a u skladu sa ovlaštenjem fizičkog lica, ne izvrši radnje u skladu sa članom 17. ovog zakona,
- k) bez naknade ne osigura fizičkom licu pristup svim raspoloživim podacima o postojećim trajnim nalogima i direktnim zaduženjima koje fizičko lice ima kod pružalaca platnih usluga u skladu sa članom 18. stav (1) ovog zakona,
- l) kao pružalac platnih usluga - prenosilac, naplati naknadu fizičkom licu ili pružaocu platnih usluga - primaocu za davanje podataka koje od njega, u skladu sa članom 15. ovog zakona, zatraži pružalac platnih usluga - primalac suprotno članu 18. stav (2) ovog zakona,
- m) naplati fizičkom licu naknade suprotno članu 18. stav (4) ovog zakona,
- n) bez odlaganja, ne nadoknadi fizičkom licu imovinsku štetu, uključujući i naknade i kamate, koju je fizičko lice pretrpjelo zbog toga što pružalac platnih usluga nije u cijelosti ili djelimično ispunio svoje obaveze iz čl. 15., 16. i 17. ovog zakona u skladu sa članom 19. stav (1) ovog zakona,
- o) fizičkom licu ne učini dostupnim informacije o usluzi prebacivanja računa za plaćanje u skladu sa članom 20. ovog zakona,
- p) ne dostavi podatke u Registar, odnosno Jedinostveni registar, u skladu s čl. 28. i 30. ovog zakona,
- r) pri prikupljanju i obradi podataka o fizičkim licima ne postupa u skladu s članom 28. stav (5) ovog zakona,
- s) podatke iz Jedinostvenog registra koristi suprotno članu 29. stav (4) ovog zakona,

- t) ne postupa u skladu sa članom 30. stav (4) ovog zakona,
- u) postupi suprotno članu 41. st. (2) i (3) ovog zakona,
- v) ne čuva dokumentaciju i podatke u skladu sa članom 45. ovog zakona,
- z) imaocu ne da ili ne učini dostupnim najmanje jednom godišnje i besplatno izvještaj o naknadama u skladu s članom 48. stav (1) ovog zakona,
- aa) na zahtjev imaoca ne dostavi korisniku izvještaj o naknadama u pisanom obliku u skladu s članom 48. stav (3) ovog zakona,
- bb) izvještaj o naknadama nije sastavljen u skladu s članom 48. st. (4) i (5) ovog zakona,
- cc) na svojoj internet stranici ne osigura poveznicu s internet stranicom Agencije u skladu s članom 50. stav (3) ovog zakona,
- dd) kao pružalac platnih usluga naplati naknade suprotno članu 52. stav (2) ovog zakona,
- ee) u poslovnim jedinicama i na svojoj internet stranici ne objavi cjenovnik po kojem naplaćuje naknade za pružanje platnih usluga i ne dostavi elektronskim putem Agenciji u roku od tri radna dana od dana početka primjene tarife, te ne osigura poveznicu na svojoj internet stranici s internet stranicom Agencije u skladu sa članom 52. stav (7) ovog zakona,
- ff) imaoca ne izvještava u skladu sa članom 53. ovog zakona i postupa suprotno članu 54. ovog zakona,
- gg) ne postupi u skladu sa članom 66. ovog zakona.

(2) Za prekršaje iz stava (1) ovog člana kaznit će se i odgovorno lice u pružaocu platne usluge novčanom kaznom u iznosu od 1.000 KM do 2.000 KM.

Član 61.

(Prekršaji FIA-e)

(1) Novčanom kaznom od 5.000 KM do 10.000 KM kaznit će se za prekršaj FIA ako:

- a) ne uspostavi i ne vodi Registar u skladu s članom 27. stav (1) ovog zakona,
- b) ne uspostavi i vodi Jedinostveni registar u skladu sa članom 29. stav (2) ovog zakona,
- c) postupa i dostavlja podatke iz Registra suprotno članu 27. st. (2) i (3) ovog zakona,
- d) postupa i dostavlja podatke iz Jedinostvenog registra suprotno članu 29. stav (6) ovog zakona,
- e) ne postupa u skladu s članom 31. stav (1) ovog zakona,
- f) ne uspostavi i ne vodi Registar sefova fizičkih lica i Registar sefova poslovnih subjekata u skladu sa čl. 32., 33. i 34. ovog zakona,
- g) postupa i dostavlja podatke iz Registra sefova fizičkih lica suprotno članu 35. stav (2) ovog zakona.

(2) Za prekršaj iz stava (1) ovog člana kaznit će se odgovorno lice u FIA-i novčanom kaznom od 1.500 KM do 3.000 KM.

(3) Novčanom kaznom od 500 KM do 1.500 KM, kaznit će se zaposleno lice u FIA ako ne postupi u skladu s članom 31. st. (2) i (3) ovog zakona.

Član 62.

(Prekršaji poslovnih subjekata)

(1) Novčanom kaznom u iznosu od 5.000 KM do 10.000 KM kaznit će se za prekršaj poslovni subjekt ako:

- a) ne otvori račune za plaćanja i novčana sredstva ne drži na računima u skladu sa članom 21. stav (1) ovog zakona,
- b) ne odredi glavni račun u skladu sa članom 23. stav (4) ovog zakona i ne postupi u skladu sa članom 24. ovog zakona,

- c) otvori račune suprotno članu 25. stav (5) ovog zakona,
- d) vrši plaćanje u gotovom novcu suprotno članu 36. st. (4) i (6) ovog zakona,
- e) vrši obračunsko plaćanje suprotno članu 36. stav (7) ovog zakona,
- f) vrši plaćanja suprotno članu 38. stav (4) ovog zakona.

(2) Za prekršaje iz stava (1) ovog člana kaznit će se odgovorno lice poslovnog subjekta novčanom kaznom u iznosu od 1.000 KM do 1.500 KM.

(3) Novčanom kaznom u iznosu od 2.500 KM do 5.000 KM kaznit će se za prekršaj poslovni subjekt ako:

- a) ne otvori račune u skladu sa čl. 21. i 22. ovog zakona,
- b) ne obavijesti ovlaštenu organizaciju o promjeni podataka koji se vode u evidenciji računa ovlaštene organizacije u skladu sa članom 22. stav (4) ovog zakona.

(4) Za prekršaje iz stava (3) ovog člana kaznit će se odgovorno lice poslovnog subjekta novčanom kaznom u iznosu od 1.000 KM do 1.500 KM.

Član 63. (Prekršaji drugih subjekata)

(1) Novčanom kaznom od 1.500 KM do 3.000 KM kaznit će se fizičko lice ako otvori račune suprotno članu 25. stav (5) ovog zakona.

(2) Novčanom kaznom od 5.000 KM do 10.000 KM kaznit će se subjekt iz člana 27. stav (3) ovog zakona, ako podatke dobivene iz Registra koristi suprotno članu 27. stav (5) ovog zakona.

(3) Za prekršaj iz stava (1) ovog člana kaznit će se odgovorno lice u subjektu, kao i lice iz člana 27. stav (6) ovog zakona novčanom kaznom od 1.500 KM do 3.000 KM.

Član 64. (Prekršajni postupak)

(1) Agencija ili drugi kontrolni organi u postupku kontrole izdaju prekršajne naloge ili podnose zahtjev za pokretanje prekršajnog postupka u slučajevima predviđenim ovim zakonom, u skladu sa propisima kojima se uređuje prekršajni postupak.

(2) Prekršajni postupak protiv poslovnog subjekta, osim organa iz stava (1) ovog člana, može pokrenuti i pružalac platnih usluga u slučaju da u postupku obavljanja usluga povezanih sa računom za plaćanje utvrdi prekršaj.

POGLAVLJE VIII. PRIJELAZNE I ZAVRŠNE ODREDBE

Član 65. (Prijelazne odredbe)

Pružaoци platnih usluga dužni su obavljanje poslova vezanih za račune za plaćanje uskladiti sa odredbama ovog zakona, najkasnije u roku od pet mjeseci od dana njegovog stupanja na snagu.

Član 66. (Donošenje podzakonskih akata)

(1) Vlada će, u roku od 90 dana od dana stupanja na snagu ovog zakona, donijeti propise iz člana 10. stav (5) i člana 36. stav (8) ovog zakona.

(2) Ministar će, u roku od 90 dana od dana stupanja na snagu ovog zakona, donijeti propise iz člana 6. stav (9), člana 7. stav (9), člana 22. stav (5) i člana 41. stav (6) ovog zakona.

(3) Do donošenja podzakonskih akata iz st. (1) i (2) ovog člana, primjenjivat će se podzakonski propisi koji su važili do dana stupanja na snagu ovog zakona, ako nisu u suprotnosti s ovim zakonom.

Član 67. (Obaveze Agencije i FIA)

(1) Agencija će donijeti akte iz člana 47. stav (7), člana 48. stav (6), člana 50. stav (4), člana 52. stav (10) ovog zakona u roku od 120 dana od dana stupanja na snagu ovog zakona.

(2) FIA će donijeti akte iz člana 27. stav (9), člana 28. stav (6), člana 30. stav (5) i člana 35. stav (4) u roku od 120 dana od dana stupanja na snagu ovog zakona.

(3) Banke su dužne FIA-i dostaviti podatke o sefovima fizičkih lica i sefovima poslovnih subjekata, otvorenim prije donošenja ovog zakona, najkasnije u roku od 90 dana od dana donošenja podzakonskog akta iz člana 35. stav (4) ovog zakona.

(4) Do donošenja akata iz st. (1) i (2) ovog člana, primjenjivat će se propisi koji su važili do dana stupanja na snagu ovog zakona, ako nisu u suprotnosti s ovim zakonom.

Član 68. (Prestanak važenja propisa)

Stupanjem na snagu ovog zakona prestaje da važi Zakon o unutrašnjem platnom prometu („Službene novine Federacije BiH“, br. 48/15, 79/15 i 4/21).

Član 69. (Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Federacije BiH".

OBRAZLOŽENJE

PRIJEDLOGA ZAKONA O RAČUNIMA ZA PLAĆANJE

I. USTAVNI OSNOV

Ustavni osnov za donošenje Zakona o računima za plaćanje sadržan je u članu III. 1. tačka c. koji je izmijenjen amandmanima VIII, LXXXIX i CVI i članu IV. A 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donošenje propisa o finansijama, a Parlament Federacije BiH, uz ostala ovlaštenja predviđena Ustavom, odgovoran je za donošenje zakona o vršenju dužnosti u federalnoj vlasti.

II. RAZLOZI ZA DONOŠENJE ZAKONA

II.1. Identifikacija i definicija problema

Platni promet je neizbježan segment privrednog života svake države, sa osnovnom zadaćom da osigura siguran i djelotvoran prijenos novčanih sredstava i izmirenje dužničkih obaveza upotrebom novca kao sredstva plaćanja. Platni promet predstavlja kompleksan sistem instrumenata, pravila i procedura, učesnika, formalnih aranžmana zasnovanih na zakonskim normama i ugovornim obavezama, te, konačno, tehnoloških rješenja savremenog doba.

Donošenjem Zakona o unutrašnjem platnom prometu („Službene novine Federacije BiH“, br. 48/15 i 79/15) i njegovim kasnijim izmjenama objavljenim u „Službenim novinama Federacije BiH“, broj: 4/21, postojeći sistem platnog prometa kontinuirano je unapređivan i dograđivan u skladu sa primjenljivim međunarodnim standardima i pozitivnom praksom zemalja iz okruženja.

Pored uspostavljanja Jedinstvenog registra računa poslovnih subjekata, a s ciljem unapređivanja postupka prinudne naplate potraživanja na novčanim sredstvima i zaštite povjerilaca, 2021. godine donesen je Zakon o izmjenama i dopunama Zakona o unutrašnjem platnom prometu, kojim je uspostavljen Registar računa fizičkih lica kao jedinstvena elektronska evidencija i centralna baza podataka o novčanim računima fizičkih lica otvorenim u bankama. Ovaj registar je omogućio bržu i lakšu identifikaciju računa dužnika u poreznom i izvršnom postupku, kao i u drugim sudskim postupcima, kod istraživanja sumnjivih aktivnosti, sprječavanja pranja novca i finansiranja terorističkih aktivnosti.

Izmjenama i dopunama Zakona o unutrašnjem platnom prometu iz 2021. godine unaprijeđena je zaštita fizičkih lica kroz uvođenje instituta platnog računa sa osnovnim uslugama s ciljem veće finansijske inkluzije fizičkih lica i utvrđivanjem dodatnih standarda transparentnosti pružanja platnih usluga i uporedivosti naknada koje se naplaćuju fizičkim licima u vezi sa platnim računima. Te odredbe preuzete su ovim zakonom, kako bi se zadržao visok nivo zaštite fizičkih lica koji im je pružen važećim zakonom. Navedene odredbe se upotpunjuju propisivanjem posebnih pravila kojima se detaljnije uređuje postupak promjene platnog računa jer će se potrošač moći opredijeliti da efikasno i brzo promijeni platni račun ili da samo prenese određene platne usluge koje je koristio kod jednog pružaoca platnih usluga (npr. određene trajne naloge i sl.) na novi platni račun. Naime, utvrđeno je da značajan broj potrošača, nakon zaključenja ugovora o otvaranju i vođenju platnog računa, naknadno dolazi do saznanja da način i uslovi pod kojima se pružaju platne usluge u vezi sa tim računom više

ne odgovaraju njihovim potrebama i interesima, odnosno da bi im drugi pružalac platnih usluga mogao ponuditi povoljnije uslove korištenja navedenih usluga.

SEPA (Single Euro Payments Area) predstavlja zajedničko područje plaćanja u kome građani i preduzeća mogu slati i primati bezgotovinske eure brzo i pod istim uslovima kao kod domaćih plaćanja, a ista je uvedena za kreditne transfere 2008. godine, za direktna zaduženja 2009. godine i u potpunosti je implementirana 2014. godine u eurozoni (u državama van eurozone 2016. godine). Cilj je da se ukinu razlike između nacionalnih i prekograničnih plaćanja harmonizacijom standarda i pravila.

Kako bi se pristupilo SEPA području, neophodne su značajne regulatorne i infrastrukturne promjene, uključujući revidiranje propisa kojim se uređuje platni promet, sprječavanje pranja novca i finansiranja terorističkih aktivnosti i sl. Imajući u vidu navedeno, na poziv Centralne banke BiH, uspostavljen je Koordinacioni odbor za pridruživanje BiH SEPA području, kojim koordinira CBBiH, a čiji članovi su predstavnici: Centralne banke BiH, entitetskih ministarstava finansija, entitetskih agencija za bankarstvo i Udruženje banaka BiH. Cilj Odbora je koordinacija, konsultacija i razmjena informacija među članovima kako bi se potaknula efikasnost i efektivnost svakog pojedinačnog člana u skladu sa ustavnim nadležnostima u procesu ispunjenja uslova za prijem BiH u SEPA, te ostale popratne aktivnosti do postizanja konačne interoperabilnosti platnih sistema BiH sa platnim sistemima SEPA područja.

Ulazak u SEPA područje će predstavljati istorijski korak ka punoj integraciji finansijskog sistema Federacije BiH u evropski okvir, uz direktne koristi za privredu i građane, prije punopravnog članstva Bosne i Hercegovine u EU, odnosno čini važan iskorak ka ekonomskoj konvergenciji domaćeg u odnosu na EU dohodak po glavi stanovnika, održivom rastu i dubljoj finansijskoj integraciji BiH u evropsko tržište.

Od ključne je važnosti da korisnici razumiju naknade kako bi mogli uporediti ponude različitih pružalaca platnih usluga i donositi informirane odluke o tome koji račun za plaćanje najbolje odgovara njihovim potrebama. (Naknade se ne mogu upoređivati kada se pružaoci platnih usluga koriste različitom terminologijom za iste usluge i pružaju informacije u različitim formatima. Standardizirana terminologija, uz ciljne informacije o naknadama predstavljene u usklađenom formatu koji obuhvata najreprezentativnije usluge povezane s računom za plaćanje, može pomoći korisnicima u razumijevanju i upoređivanju naknada).

Potrebno je jasnije i preciznije definirati obim informacija koje su pružaoci platnih usluga dužni dati učesniku – fizičkom licu u platnom prometu u odnosu na rješenja iz važećeg propisa kojim se uređuje unutrašnji platni promet u Federaciji u vezi sa platnim uslugama koje ovlaštene organizacije, definirane važećim zakonom, pružaju.

U Evropskoj uniji je urađeno istraživanje i objavljen je dokument Evropske komisije koji se odnosi na utjecaj ograničavanja međubankarskih naknada, gdje se navodi da su pritisci konkurencije u maloprodaji jači od efekata konkurencije u bankarstvu, te da se prije može očekivati da će poslovni subjekti svoju uštedu, koju ostvare kroz niže trgovačke naknade, prenijeti na korisnike, nego da će banke benefite od viših međubankarskih naknada prenijeti na svoje klijente (npr. kroz niže troškove članarine za platne kartice). Ovim zakonom nastavlja se opredijeljenost za propisivanje ograničenja međubankarskih naknada u skladu sa praksama članica EU.

U savremenom okruženju država članica Evropske unije, gdje se upotreba gotovog novca velikom brzinom smanjuje u korist primjene platnih kartica i drugih oblika bezgotovinskog plaćanja, stupanjem na snagu Direktive (EU) 2014/92 u julu 2014. godine, utvrđena je obaveza zemljama članicama da omoguće potrošačima (fizičkim licima), koji imaju zakonito boravište u Evropskoj uniji i koji u određenoj državi članici nemaju račun za plaćanje, da otvore

osnovni platni račun i njime se koriste. Zakonom se detaljnije propisuje institut osnovnog računa radi veće finansijske uključenosti fizičkih lica, a polazeći od različitih kategorija stanovništva i omogućavanja istima otvaranja i korištenja računa za plaćanje s osnovnim uslugama u platnom prometu sa limitiranim iznosom naknada za otvaranje i korištenje istog. Navedenim odredbama osigurava se veća uključenost fizičkih lica u platni promet i korištenje platnog računa sa osnovnim uslugama uz plaćanje razumne naknade.

Radi otklanjanja uočenih problema u praksi i propusta u evidentiranju računa fizičkih lica, predloženo je da se Zakon o unutrašnjem platnom prometu osnaži u segmentu dopune podataka koje treba sadržavati Registar računa fizičkih lica. Predloženo je da ovaj registar sadrži i podatak o statusu računa fizičkog lica u smislu da li na računu postoje evidentirani, a neizmireni nalozi za prinudnu naplatu, s obzirom na to da u takvim slučajevima, a s ciljem zaštite potraživanja povjerilaca, nije dozvoljeno otvaranje novih platnih računa. U tom smislu, daje se mogućnost bankama da pribave podatke iz Registra računa fizičkih lica za potrebe otvaranja osnovnog računa i za potrebe otvaranja platnih računa fizičkom licu radi provjere statusa drugih platnih računa tog fizičkog lica. U oba navedena slučaja, banka može dobiti navedene podatke, samo ako je lice na koje se ovi podaci odnose prethodno dalo pismeni pristanak.

Pored toga, Zakonom se vrši dalje usklađivanje domaćeg zakonodavstva sa Direktivom (EU) 2014/92, u smislu usklađivanja sa odredbama ove direktive vezanim za prebacivanje platnog računa iz jednog u drugog pružaoca platnih usluga, u skladu sa potrebama tržišta.

Registri sefova fizičkih i poslovnih subjekata uspostavljeni su u okruženju i zemljama Evropske unije, a uspostavljanje ovakvih centralizovanih baza podataka nalažu i međunarodni standardi i Direktiva (EU) 2018/843 koja uređuje sprječavanje pranja novca i finansiranja terorističkih aktivnosti. Predloženo je da Registar sefova fizičkih lica i Registar sefova poslovnih subjekata sadrži podatke o korisnicima bankarskih sefova. Imajući u vidu da se u sefu mogu pohranjivati i čuvati stvari različite prirode i vrijednosti, te da su pristup sefu i njegovo prinudno otvaranje, uređeni propisom o obligacionim odnosima i prinudnim propisima, zakonom se predlaže da podaci iz registara nisu javno dostupni, i to kako podaci o postojanju bankarskih sefova fizičkih lica, tako i podaci o postojanju sefova poslovnih subjekata. Na registre se primjenjuju propisi kojima se uređuju bankarska tajna i zaštita ličnih podataka, a pristup registru omogućen je uskom krugu ovlaštenih korisnika, tačnije sudovima, organima nadležnim za borbu protiv organizovanog kriminala i korupcije, te sprječavanje pranja novca i finansiranja terorističkih aktivnosti.

U izradi Zakona korišten je važeći pravni okvir, odnosno zakonska rješenja u BiH i Federaciji, preporuke sadržane u relevantnim direktivama i ostalim izvorima prava EU, Međunarodni standardi u borbi protiv pranja novca i finansiranja terorističkih aktivnosti (FATF preporuke), te relevantna rješenja uporednog prava zemalja iz okruženja.

II.2. Ciljevi koji se namjeravaju postići donošenjem zakona

Donošenjem Zakona očekuje se unapređenje pružanja usluga plaćanja korisnicima s osnova povećanja transparentnosti i uporedivosti naknada koje su povezane s računom za plaćanje, a u skladu sa najboljim međunarodnim praksama.

Pored namjere da se domaći platni promet modernizira i približi visokim zahtjevima evropskih direktiva, donošenjem ovog zakona Federacija bi doprinijela ispunjavanju zahtjeva BiH u vezi sa članstvom u SEPA međunarodnom platnom sistemu.

S obzirom na to da BiH nije članica EU, za njeno učlanjenje u SEPA sistem potrebno je ispuniti definirane kriterije propisane od Evropskog platnog vijeća i službeno podnijeti zahtjev za članstvo države, nakon čega se banke pojedinačno mogu priključivati ovoj platnoj mreži.

Uspostavljanjem jedinstvenih pravila omogućit će se vrlo jednostavan uporedni prikaz usluga i visine naknada vezanih uz račun za plaćanje. Poboljšanjem transparentnosti i uporedivosti naknada omogućit će se imaćima računa za plaćanje bolje razumijevanje naknada vezanih uz račun za plaćanje. Na ovaj način korisnici će imati mogućnost uporediti ponude različitih pružalaca platnih usluga i donijeti odluku o tome koji račun za plaćanje najbolje odgovara njihovim potrebama. U tu svrhu zakon propisuje način, sadržaj i oblik informacionog dokumenta o naknadama koji će obuhvatati naknade koje pružalac platnih usluga naplaćuje za najreprezentativnije, odnosno najčešće korištene platne usluge. Pritom će biti u obavezi koristiti se standardiziranim pojmovima, odnosno nazivima usluga, čime će se korisniku dodatno olakšati upoređivanje ponuda različitih pružalaca platnih usluga. Listu najreprezentativnijih usluga povezanih s računom za plaćanje utvrdit će Agencija za bankarstvo Federacije BiH. Dodatno, informacioni dokument o naknadama morat će biti dostupan korisnicima u obliku kratkog dokumenta, koji je napisan lako razumljivim riječima i jednostavan za čitanje. Takve informacije koje su sažete, standardizirane i jednostavne za poređenje pomoći će korisnicima u još boljem razumijevanju i upoređivanju naknada između različitih pružalaca platnih usluga s obzirom na to da će sve ključne informacije biti sažete u jednom kratkom dokumentu s korištenim standardiziranim pojmovima. Pružaocima platnih usluga se, također, uvodi dodatna obaveza informiranja korisnika o naplaćenim naknadama. Naime, pružalac platnih usluga dužan je korisnika, najmanje jedanput godišnje, besplatno informirati o svim naplaćenim naknadama vezano uz račun za plaćanje, uključujući i informaciju o kamatama naplaćenima za prekoračenje. Na taj način korisnik će jednom godišnje, na jednom dokumentu, biti detaljno informiran o svim naknadama i kamatama koje mu je zaračunao njegov pružalac platnih usluga u proteklih godinu dana, što dosad nije bio slučaj. Time će se korisnike dodatno osvijestiti o stvarnom iznosu naknada koje plaća na godišnjem nivou. Kako bi se korisnicima omogućio pristup nepristranim i vjerodostojnim informacijama o visini naknada vezanih uz račun za plaćanje koje naplaćuju svi pružaoci platnih usluga u Federaciji, Agencija na svojoj će internet stranici objavljivati uporedni prikaz naknada koje različiti pružaoci platnih usluga naplaćuju korisnicima za najreprezentativnije usluge povezane s računom za plaćanje. Informacije o naknadama koje će se objavljivati na internet stranici redovno će se ažurirati na osnovu podataka prikupljenih od pružalaca platnih usluga. Pristup navedenoj stranici bit će besplatan i korisnicima će omogućiti dobijanje jasnih, sažetih i tačnih informacija o naknadama koje naplaćuju pružaoci platnih usluga u Federaciji, i to sve na jednom mjestu bez nepotrebnih troškova. Time će korisnici vrlo jednostavno moći odabrati najpovoljnijeg pružaoca platnih usluga.

Ograničava se visina međubankarske naknade kod transakcija platnim karticama, koje ne mogu biti više od 0,2% vrijednosti izvršene transakcije kod transakcije debitnom karticom, a kod transakcije kreditnom karticom ne može biti viša od 0,3% vrijednosti izvršene transakcije što je u skladu s odredbama Uredbe (EU) 2015/751. Pružalac platne usluge ne može naplatiti niti ponuditi međubankarsku naknadu suprotno ovim ograničenjima. Očekivano je da se ograničavanjem međubankarskih naknada i povećanjem transparentnosti na tržištu stvore uslovi da konkurencija među bankama i kartičnim sistemima dovede do bržeg razvoja bezgotovinskih plaćanja sa svim prednostima tih plaćanja za ekonomiju zemlje uopće.

Kako bi se poslovnim subjektima omogućio pristup nepristranim i vjerodostojnim informacijama o visini naknada koje naplaćuju pružaoci platnih usluga u Federaciji, Agencija

će na svojoj internet stranici objavljivati uporedni prikaz naknada koje pružaoci platnih usluga naplaćuju korisnicima za platne usluge. Informacije o naknadama koje će se objavljivati na internet stranici redovno će se ažurirati na osnovu podataka prikupljenih od pružaoca platnih usluga. Pristup navedenoj stranici bit će besplatan i korisnicima će omogućiti dobijanje jasnih, sažetih i tačnih informacija o naknadama koje naplaćuju pružaoci platnih usluga u Federaciji i to sve na jednom mjestu bez nepotrebnih troškova. Time će korisnici vrlo jednostavno moći odabrati najpovoljnijeg pružaoca platnih usluga.

Također se želi utjecati na smanjenje troškova socijalno osjetljivim kategorijama stanovništva, u vrijeme nastale ekonomske krize, na način da se podzakonskim aktom omoguće povlaštene naknade za pružanje osnovnih usluga u platnom prometu za navedene kategorije.

II.3. Alternativna rješenja - identifikacija opcija

Opcija 1: Ne poduzimati ništa

Koristi: Nema koristi, jer cilj nije moguće postići nenormativnim rješenjem. Ova opcija nema značajne utjecaje na područje socijalne zaštite, područje zaštite okoliša i privredu.

Troškovi: Ova opcija nema značajne utjecaje na područje socijalne zaštite, područje zaštite okoliša i privredu.

Opcija 2: (nenormativno rješenje)

Koristi: Cilj nije moguće postići nenormativnim rješenjem, odnosno donošenjem administrativno-stručnih mjera regulatora bez donošenja novog zakona. Ova opcija nema značajne utjecaje na područje socijalne zaštite, područje zaštite okoliša i privredu.

Troškovi: Ova opcija nema značajne utjecaje na područje socijalne zaštite, područje zaštite okoliša i privredu.

Opcija 3: (normativno rješenje)

Koristi: Normativno rješenje ne može biti izvršeno kroz izmjene i dopune važećeg Zakona o unutrašnjem platnom prometu, s obzirom da se radi o većem broju izmjena čiji obim prevazlazi više od polovine postojećih odredbi zakona. Ova opcija nema značajne utjecaje na područje socijalne zaštite, područje zaštite okoliša i privredu.

Troškovi: Ova opcija nema značajne utjecaje na područje socijalne zaštite, područje zaštite okoliša i privredu.

Opcija 4: (normativno rješenje)

Koristi: Normativno rješenje može biti izvršeno kroz drugo normativno rješenje, odnosno donošenje novog Zakona o računima za plaćanje, s obzirom da važeći zakon regulira dio materije, ali je zbog obima izmjena potrebno izraditi novi zakon. Ova opcija nema značajne utjecaje na područje socijalne zaštite, područje zaštite okoliša i privredu.

Troškovi: Ova opcija nema značajne utjecaje na područje socijalne zaštite, područje zaštite okoliša i privredu.

II.4. KONSULTACIJE

Federalno ministarstvo finansija je obavilo konsultacije s Agencijom za bankarstvo Federacije BiH, Udruženjem banaka BiH, Centralnom bankom BiH te je objavilo tekst zakona na svojoj internet stranici 02.12.2025. godine i dat je rok od 10 dana za dostavljanje primjedbi i sugestija. Određeni prijedlozi i stručne sugestije ugrađene su u tekst predloženog zakona.

III. USKLAĐENOST S PROPISIMA EVROPSKE UNIJE

Nakon uvida u propise Evropske unije i analize odredbi Nacrta zakona o računima za plaćanje ustanovljeno je da postoje izvori EU *acquis* relevantni za materiju koju uređuje dostavljeni Nacrt, te da su odredbe djelimično usklađene s njima.

Predmetna materija, u dijelu primarnih izvora prava EU, uređena je Ugovorom o funkcioniranju Evropske unije (prečišćeni tekst 15.03.2025. godine), Dio prvi – Načela, Glava II – Odredbe koje imaju opću primjenu, član 16. stav 1, Dio treći - Politike i unutrašnja djelovanja unije, Glava VII – Zajednička pravila o tržišnom takmičenju, oporezivanju i usklađivanju zakonodavstava, Poglavlje 3 – Usklađivanje zakonodavstva, član 114., Dio šesti - Institucionalne i finansijske odredbe, Glava I – Odredbe o institucijama, Poglavlje 2 – Pravni akti Unije, postupci donošenja i druge odredbe, Odjeljak 2. Postupci za donošenje akata i druge odredbe, član 294. (Treaty on the Functioning of the European Union, Consolidated Version, 15 March 2025, Part One – Principles, Title II – Provisions Having General Application, Article 16 Paragraph 1, Part Three - Union Policies and Internal Actions, Title VII, – Common rules on competition, taxation and approximation of laws, Chapter 3 – Approximation of laws, Article 114, Part Six - Institutional and Financial Provisions, Title I - Institutional Provisions, Chapter 2 - Legal acts of the Union, adoption procedures and other provisions, Section 2 - Procedures for the adoption of acts and other provisions Article 294).

Pored Ugovora, predmetnu materiju Nacrta, uređuje i Povelja o osnovnim pravima Evropske unije, Naslov IV – Solidarnost, član 8. – Zaštita ličnih podataka (Charter of fundamental rights of the European Union, Title IV – Solidarity, Article 8 – Protection of personal data).

Predmetnim Zakonom o računima za plaćanje, između ostalog, uspostavlja se Registar sefova, kao jedinstvena elektronska evidencija i centralna baza podataka o sefovima u bankama. Uspostavljanje i vođenje spomenutog registra povjereno je FIA-i. Prilikom definiranja odredbi kojima se utvrđuju ovlaštenja i obaveze FIA-e i ovlaštenih organizacija za obavljanje platnog prometa, predlagač je imao u vidu propise koji uređuju zaštitu ličnih podataka kao i sprečavanje pranja novca i finansiranja terorističkih aktivnosti. Navedeno je u dijelu sekundarnih izvora prava EU, djelimično usklađeno sa sljedećim izvorima:

- Direktivom 2014/92/EU Evropskog parlamenta i Vijeća od 23. jula 2014. o usporedivosti naknada povezanih s računima za plaćanje, prebacivanju računa za plaćanje i pristupu računima za plaćanje s osnovnim uslugama (Tekst značajan za EGP) (Directive 2014/92/EU of the European Parliament and of the Council of 23 July 2014 on the comparability of fees related to payment accounts, payment account switching and access to payment accounts with basic features (Text with EEA relevance)),

- Direktivom 2018/843/EU Evropskog parlamenta i Vijeća od 30. maja 2018. godine o izmjeni Direktive (EU) 2015/849 o sprječavanju korištenja finansijskog sistema u svrhu pranja novca ili finansiranja terorizma i o izmjeni direktiva 2009/138/ES i 2013/36/EU (Tekst značajan za EGP) (Directive (EU) 2018/843 of the European Parliament and of the Council of 30 May 2018 amending Directive (EU) 2015/849 on the prevention of the use of the financial system for the

purposes of money laundering or terrorist financing, and amending Directives 2009/138/EC and 2013/36/EU (Text with EEA relevance)),

- Uredbom (EU) 2016/679 Evropskog parlamenta i Vijeća od 27. aprila 2016. godine o zaštiti pojedinaca u vezi s obradom ličnih podataka i o slobodnom kretanju takvih podataka te o stavljanju van snage Direktive 95/46/EZ (Opća uredba o zaštiti podataka) (Tekst značajan za EGP) (Regulation (EU) 2016/679 of the European Parliament and of the Council of 27 April 2016 on the protection of natural persons with regard to the processing of personal data and on the free movement of such data, and repealing Directive 95/46/EC (General Data Protection Regulation) (Text with EEA relevance)),

- Uredbom (EU) 2015/751 Evropskog parlamenta i Vijeća od 29. aprila 2015. godine o međubankarskim naknadama za platne transakcije na osnovu kartica (Tekst značajan za EGP) (Regulation (EU) 2015/751 of the European Parliament and of the Council of 29 April 2015 on interchange fees for card-based payment transactions (Text with EEA relevance)).

IV. OBRAZLOŽENJE POJEDINIH ODREDBI

Općim odredbama Zakona (čl. 1. do 5.) uređuje se predmet zakona, propisuje se usklađivanje s pravnim aktima Evropske unije, definiraju se pojmovi koji se koriste u ovom zakonu, propisuje se primjena drugih zakona, kao i usluge povezane sa računom za plaćanje koje može pružati banka.

U II. dijelu, poglavlju I., odjeljku A. (čl. 6. i 7.) propisuju se računi za plaćanje i tekući račun.

Odjeljak B. (čl. 8. do 11.) propisuje uslove otvaranja i evidencije računa fizičkih lica, otvaranje osnovnog računa, naknade koje su povezane sa osnovnim računom, te raskid ugovora o osnovnom računu.

U odjeljku C (čl. 12. do 20.) propisuje se prebacivanje računa za plaćanje, kao i obaveze pružaoca platnih usluga – primaoca i obaveze pružaoca platnih usluga – prenosioca u tom procesu, koji ima za cilj uredan i neprekidan nastavak platnih aktivnosti korisnika. Nadalje, utvrđuje se pravo fizičkog lica na besplatan pristup informacijama o postojećim trajnim nalogima i direktnim zaduženjima kod pružalaca platnih usluga te se zabranjuje naplata naknada za pružanje tih podataka. Propisuje se odgovornost pružalaca platnih usluga uključenih u postupak prebacivanja računa za plaćanje za imovinsku štetu koju fizičko lice pretrpi zbog neispunjavanja njihovih obaveza iz zakona, kao i obaveza pružaoca platnih usluga da fizičkom licu pruži jasne i potpune informacije o postupku prebacivanja računa za plaćanje.

U odjeljku D (čl. 21. do 24.) propisuje se obaveza poslovnih subjekata da otvore tekuće račune u bankama i da sva novčana sredstva vode i plaćanja obavljaju preko tih računa, način otvaranja i vrste otvorenih računa te obavezu određivanja glavnog računa. Također, uređuju se obaveze banaka prilikom otvaranja i vođenja računa poslovnih subjekata da vode evidenciju svih računa koju objedinjuje u Jedinstvenom registru računa poslovnih subjekata. Obavezuje se i poslovni subjekt da obavijesti banku o svakoj promjeni podataka u roku od osam dana. Nadalje, propisuje da poslovni subjekt kod jedne banke može imati samo jedan tekući račun i po jedan račun za svaki organizacioni dio, dok se za posebne namjene mogu otvarati više računa te se uređuje institut glavnog računa.

U odjeljku E (čl. 25. do 26.) propisuje se obaveza banke da zatvori tekući račun na zahtjev imaoca ili po službenoj dužnosti, u skladu sa ugovorom i važećim propisima, pri čemu zatvaranje računa i gašenje platne kartice fizičkom licu ne smije biti naplaćeno. Također,

propisuje da se račun ne može zatvoriti ako postoje neizvršeni nalozi za prinudnu naplatu, kao i da banka mora imati propisane procedure za postupanje s neaktivnim računima i uređene odnose s imaocima.

U II. dijelu, poglavlju II., odjeljku A. (čl. 27. do 31.) propisana je obaveza FIA-e da vodi Registar računa fizičkih lica, obaveza pružaoca platnih usluga da dostavljaju podatke o računima fizičkih lica u Registar, način i vrijeme dostavljanja podataka, te odgovornost pružalaca za tačnost i ažurnost dostavljenih podataka. Nadalje, obavezuje se FIA da uspostavi i vodi Jedinstveni registar, koji predstavlja javnu evidenciju i centralnu bazu podataka računa za plaćanje poslovnih subjekata.

Odjeljak B. (čl. 32. do 35.) propisuje obavezu FIA-a da uspostavi i vodi Registar sefova fizičkih lica i Registar sefova poslovnih subjekata koje banke stavljaju na upotrebu korisnicima sefa, kao i da podaci iz Registara sefova nisu javni i da se štite prema pravilima o poslovnoj tajni i ličnim podacima, da podatke FIA može dostaviti ili omogućiti pristup samo uz saglasnost osobe na koju se podaci odnose, na osnovu sudske odluke ili zahtjeva, te nadležnim organima za unutrašnje poslove, borbu protiv organizovanog kriminala, korupcije i pranja novca, kao i u postupcima izvršenja ili osiguranja prema nalogu suda ili drugog nadležnog organa. Također je propisano da se na obradu ovih podataka primjenjuju ista pravila koja važe za ostale registre pod nadzorom FIA-e.

U poglavlju III., odjeljku A. (čl. 36. i 37.) propisuju se vrste plaćanja, ograničenja za poslovne subjekte, posebno u situacijama kada imaju blokirane račune, kao i obaveza pružaoca platnih usluga da izvršavaju naloge za plaćanje u skladu sa propisom o platnim uslugama.

Odjeljak B. (čl. 38. do 46.) propisuje izvršenje naloga za prinudnu naplatu, redoslijed prioriteta, postupak u slučaju nedostatnih sredstava na glavnom računu, postupanje banke u vezi sa oročenim sredstvima poslovnog subjekta u slučaju neizmirenih naloga prinudne naplate, obavezu pružaoca platnih usluga u vezi s čuvanjem naloga za plaćanje i druge dokumentacije koja evidentira promjene na računima u rokovima propisanim za arhivsku djelatnost, računovodstvo, reviziju i sprječavanje pranja novca. Nadalje, utvrđuje se odgovornost u postupku prinudne naplate za pružaoce platnih usluga kao i za nalogodavce, te odgovornost za štetu koja može nastati obavljanjem poslova povezanih sa računom za plaćanje.

U poglavlju IV. (čl. 47. do 52.) propisuju se obaveze pružaoca platnih usluga: da prije sklapanja ugovora fizičkom licu pravovremeno da informacioni dokument i pojmovnik o naknadama za najreprezentativnije usluge, da za izvršene usluge povezane sa računom za plaćanje besplatno dostavi izvještaj o svim obračunatim naknadama i kamatama. Nadalje, propisuje se visina naknade koju mogu naplatiti za pružanje platnih usluga, kao i međubankarska naknada kod transakcija debitnom i kreditnom karticom. Ovim odredbama se ne isključuje obaveza pružaoca platnih usluga da pruži informacije koje je dužan pružiti u skladu sa odredbama propisa o platnim uslugama i propisa o zaštiti korisnika finansijskih usluga.

Poglavljem V. (čl. 53. do 55.) utvrđuje se obaveza pružaoca platnih usluga da stave na raspolaganje imaocima izvještaje o svim promjenama i stanju računa u skladu sa propisom o platnim uslugama, kao i zabrana da pružaoци platnih usluga i banke učesnicima naplaćuju naknadu za pružene informacije o svim važnim uslovima korištenja usluga povezanih sa računom za plaćanje, prije zaključenja ugovora, te mogućnost da se pružaoци platnih usluga i imaoci dogovore o troškovima za dodatno ili češće dostavljanje informacija ili njihov prijenos putem kanala komunikacije u skladu sa propisom o zaštiti korisnika finansijskih usluga. Također, obavezuju se pružaoци platnih usluga i imaoci da u vezi sa poslovima povezanim sa računima za plaćanje postupaju u skladu sa propisom o sprječavanju pranja novca i finansiranja terorističkih aktivnosti.

Poglavlje VI. Zakona odnosi se na nadzor nad obavljanjem poslova povezanim sa računima za plaćanje (čl. 56. do 58.), koji obavlja Agencija za bankarstvo Federacije BiH i drugi kontrolni organi, kao i saradnja i oblici saradnje.

U poglavlju VII. propisane su prekršajne i kaznene odredbe (čl. 59. do 64.). Predviđene su novčane kazne za nepoštovanje obaveza iz ovog zakona, koje su usaglašene sa propisom o prekršajima.

U poglavlju VIII. koje se odnosi na prijelazne i završne odredbe (čl. 65. do 69.) propisani su rokovi za donošenje podzakonskih akata na osnovu ovog zakona te se utvrđuje rok prestanka važenja Zakon o unutrašnjem platnom prometu („Službene novine Federacije BiH“, br. 48/15, 79/15 i 4/21), kao i stupanje na snagu zakona.

V. FINANSIJSKA SREDSTVA

Za uspostavljanje registara sefova fizičkih lica i poslovnih subjekata bit će potrebna finansijska sredstva koja se mogu osigurati iz vlastitih sredstava FIA-e, kao i iz sredstava finansijske pomoći, donacija i drugih izvora prikupljenih u svrhu uspostavljanja ovih registara, osiguranja sigurnosti i povjerljivosti podataka, te njihove zaštite u skladu sa odredbama ovog zakona i zakona kojim se uređuje zaštita ličnih podataka.

S obzirom na to da se FIA finansira od naknada ostvarenih svojim poslovanjem, u koje spadaju i naknade za korištenje podataka iz ovih registara, za provođenje ovog zakona nisu potrebna finansijska sredstva iz budžeta Federacije.

IZJAVA O USKLAĐENOSTI		
1. Podaci o obrađivaču u propisa	Naziv federalnog organa uprave, odnosno federalne upravne organizacije	Federalno ministarstvo finansija – Federalno ministarstvo financija
	Naziv organizacione jedinice	Sektor za privredu i finansijski sistem – Odsjek za finansijsko poslovanje, računovodstvo i reviziju
2. Naziv propisa		Nacrt Zakona o računima za plaćanje Draft Law on payment accounts
3. Usklađenost propisa s odredbama Sporazuma o stabilizaciji i pridruživanju		
3.1.	Odredba Sporazuma	Glava VI - Usklađivanje zakona, sprovođenje zakona i pravila konkurencije, članak 70. Glava VIII - politike suradnje, članak 89. bankarstvo, osiguranje i ostale finansijske usluge
3.2.	Ocjena ispunjenosti iz navedene odredbe Sporazuma	Djelomično ispunjava
3.3.	Razlozi za djelomično ispunjavanje odnosno neispunjavanje obveze iz navedene odredbe Sporazuma i rok u kojem je predviđeno postizanje potpune usklađenosti	Imajuć u vidu niži stepen razvijenosti tržišta u Federaciji BiH u odnosu na tržište Evropske unije i obzirom da u ovom trenutku nije moguće implementirati sva rješenja iz direktiva. Odredbama člana 8. Sporazuma je propisan rok od 6 godina za potpuno usklađivanje. Rok je istekao 01.06.2021. godine.
4. Veza propisa sa Programom integrisanja (PI)		
4.1.	PI za razdoblje	-
4.2.	Poglavlje, potpoglavlje	-
4.3.	Rok za donošenje propisa	-
4.4.	Napomena	-
5. Usklađenost propisa s pravnom tečevinom EU		
5.1.	Primarni izvori prava EU	Predmetna materija, u dijelu primarnih izvora prava EU, uređena je Ugovorom o funkcioniranju Evropske unije (prečišćeni tekst 15.03.2025. godine), Dio prvi – Načela, Glava II – Odredbe koje imaju opću primenu, član 16. stav 1, Dio treći - Politike i unutrašnja djelovanja unije, Glava VII – Zajednička pravila o tržišnom takmičenju, oporezivanju i usklađivanju zakonodavstava, Poglavlje 3 – Usklađivanje zakonodavstva, član 114., Dio šesti - Institucionalne i finansijske odredbe, Glava I – Odredbe o institucijama, Poglavlje 2 – Pravni akti Unije, postupci donošenja i druge odredbe, Odjeljak 2. Postupci za donošenje akata i druge odredbe, član 294. (Treaty on the Functioning of the European Union, Consolidated Version, 15 March 2025, Part One – Principles, Title II – Provisions Having General Application, Article 16 Paragraph 1, Part Three - Union Policies and Internal Actions, Title VII, – Common rules on competition, taxation and approximation of laws, Chapter 3 – Approximation of laws, Article 114, Part Six - Institutional and Financial Provisions, Title I - Institutional Provisions, Chapter 2 - Legal acts of the Union, adoption procedures and other provisions, Section 2 - Procedures for the adoption of acts and other provisions Article 294). Povelja o osnovnim pravima Evropske unije, Naslov IV – Solidarnost, član 8. – Zaštita ličnih podataka (Charter of fundamental rights of the European Union, Title IV – Solidarity, Article 8 – Protection of personal data). Djelimično usklađeno
5.2.	Sekundarni izvori prava EU	- Direktiva 2014/92/EU Evropskog parlamenta i Vijeća od 23. jula 2014. o usporedivosti naknada povezanih s računima za plaćanje, prebacivanju računa za plaćanje i pristupu računima za plaćanje s osnovnim uslugama (Tekst značajan za EGP) (SL L 257, 28.8.2014, pp. 214–246) (Directive 2014/92/EU of the European Parliament and of the Council of 23 July 2014 on the comparability of fees related to payment accounts, payment account switching and access to payment accounts with basic features (Text with EEA relevance)) (OJ L 257, 28.8.2014, pp. 214–246) CELEX 32014L0092 - Direktiva (EU) 2018/843 Evropskog parlamenta i Vijeća od 30. maja 2018. o izmjeni Direktive (EU) 2015/849 o sprečavanju korištenja finansijskog sistema u svrhu pranja novca ili finansiranja terorizma i o izmjeni Direktiva 2009/138/EZ i 2013/36/EU (Tekst značajan za EGP) (SL L 156, 19.6.2018, pp. 43–74) (Directive (EU) 2018/843 of the European Parliament and of the Council of 30 May 2018 amending Directive (EU) 2015/849 on the prevention of the use of the financial

		system for the purposes of money laundering or terrorist financing, and amending Directives 2009/138/EC and 2013/36/EU (Text with EEA relevance) (OJ L 156, 19.6.2018, pp. 43–74) CELEX 32018L0843 - Uredba (EU) 2016/679 Europskog parlamenta i Vijeća od 27. aprila 2016. o zaštiti pojedinaca u vezi s obradom ličnih podataka i o slobodnom kretanju takvih podataka te o stavljanju izvan snage Direktive 95/46/EZ (Opća uredba o zaštiti podataka) (Tekst značajan za EGP) (SL L 119 4.5.2016, 1) (Regulation (EU) 2016/679 of the European Parliament and of the Council of 27 April 2016 on the protection of natural persons with regard to the processing of personal data and on the free movement of such data, and repealing Directive 95/46/EC (General Data Protection Regulation) (Text with EEA relevance)) (OJ L 119 4.5.2016, p. 1) CELEX 32016R0679 - Uredba (EU) 2015/751 Europskog parlamenta i Vijeća od 29. aprila 2015. o međubankarskim naknadama za platne transakcije na osnovu kartica (Tekst značajan za EGP) (SL L 123, 19.5.2015, pp. 1–15) (Regulation (EU) 2015/751 of the European Parliament and of the Council of 29 April 2015 on interchange fees for card-based payment transactions (Text with EEA relevance)) (OJ L 123, 19.5.2015, pp. 1–15) CELEX 32015R0751
5.3.	Stupanj usklađenosti sa sekundarnim izvorima prava	Djelimično usklađeno
5.4.	Razlozi za djelomičnu usklađenost ili neusklađenost	Odredbe Direktive su preuzete u najvećoj mogućoj mjeri, osim odredbi koje su neprenosive i odnose se isključivo na Evropsku komisiju, odnosno na zemlje članice EU.
5.5.	Rok za potpuno usklađivanje	01.01.2040. godine
5.6.	Ostali izvori prava EU	-
6.	Ukoliko ne postoje odgovarajući propisi EU sa kojima je potrebno izvršiti usklađivanje potrebno je to konstatirati	-
7.	Da li je osiguran prijevod pravnih izvora na službene jezike u uporabi u Federaciji Bosne i Hercegovine	DA
8.	Da li je propis preveden na engleski jezik?	NE
	Ovlašteno lice obrađivača odnosno predlagatelj  Toni Krajević	Direktor Ureda Vlade Federacije Bosne i Hercegovine za zakonodavstvo i usklađenost sa propisima Evropske unije  Zeljko Silić
	Datum i pečat:	14 -01- 2026

KONTROLNA IZJAVA O PROVEDENOJ PROCJENI UTJECAJA PROPISA

Kontrolna izjava o provedenoj procjeni utjecaja propisa		
Naziv prednacrta/nacrta zakona	Prednacrt Zakona o platnim uslugama	
Datum	29.12.2025. godine	
Kontrolno područje	DA	Obrazloženje Ureda
AKTIVNOST		
Naziv prednacrta/nacrta zakona je naveden i razumljiv	DA	
Naveden je naziv i kontakti obrađivača	DA	
Naveden je datum	DA	
DEFINIRANJE PROBLEMA		
Problem je jasno i sažeto objašnjen	DA	
Ciljevi su jasno i sažeto objašnjeni	DA	
Očekivani rezultati su jasno i sažeto objašnjeni	DA	
KONZULTACIJE		
Zainteresirane strane su jasno definirane	DA	
Proces konzultacija je jasno i sažeto objašnjen	DA	
PREDLOŽENA RJEŠENJA		
Predložena su normativna i nenormativna rješenja	DA	
Definirani su rizici predloženog rješenja	DA	
Definiran je utjecaj rješenja na proračun	DA	
Definiran je utjecaj rješenja na gospodarstvo, društvo, okoliš, te održivi razvoj i zdravlje ljudi	DA	
Definiran je način primjene i usuglašenost s ostalim propisima	DA	
Definirano je prijelazno razdoblje	DA	
PROCJENA PROVEDENA SUKLADNO UREDBI	DA	

URED VLADE FBiH ZA ZAKONODAVSTVO I USKLAĐENOST
SA PROPISIMA EUROPSKE UNIJE
Željko Siladić, direktor Ureda
Datum i pečat 29.12.2025. godine

OVLAŠTENA OSOBA

Handwritten signature

OBRAZAC IZJAVA O FISKALNOJ PROCJENI						
Obrazac IFP NE						
A 1. Obradivač propisa						
	KOD	NAZIV				
Razdjel	1601	FEDERALNO MINISTARSTVO FINANSIJA				
B 2. Osnovni podaci o prijedlogu propisa						
Vrsta propisa/akta	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE
Naziv propisa/akta	NACRT ZAKONA O PLATNIM USLUGAMA					
C 3. Izjava o nepostojanju dodatnih fiskalnih efekata predloženog propisa						
ZA REALIZACIJU NACRTA ZAKONA O PLATNIM USLUGAMA NIJE POTREBNO OBEZBIJEDITI FINANSIJSKA SREDSTVA IZ BUDŽETA FEDERACIJE BOSNE I HERCEGOVINE						
D 4. Pečat i potpis odgovornog lica	MINISTAR Toni Krstić		Mjesto i datum	Sarajevo, 24.12.2025. godine		
						

OBRAZAC IZJAVA O FISKALNOJ PROCJENI						
						Obrazac IFP NE
A 1. Obradivač propisa						
	KOD	NAZIV				
Razdjel	1601	FEDERALNO MINISTARSTVO FINANSIJA				
B 2. Osnovni podaci o prijedlogu propisa						
Vrsta propisa/akta	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE
Naziv propisa/akta	NACRT ZAKONA O PLATNIM USLUGAMA					
C 3. Izjava o nepostojanju dodatnih fiskalnih efekata predloženog propisa						
ZA REALIZACIJU NACRTA ZAKONA O PLATNIM USLUGAMA NIJE POTREBNO OBEZBIJEDITI FINANSIJSKA SREDSTVA IZ BUDŽETA FEDERACIJE BOSNE I HERCEGOVINE						
D 4. Pečat i potpis odgovornog lica		MINISTAR Toni Krnjević	Mjesto i datum	Sarajevo, 24.12.2025. godine		
						

OBRAZAC IZJAVA O FISKALNOJ PROCJENI						
Obrazac IFP NE						
A 1. Obradivač propisa						
Razdjel	KOD	NAZIV				
	1601	FEDERALNO MINISTARSTVO FINANSIJA				
B 2. Osnovni podaci o prijedlogu propisa						
Vrsta propisa/akta	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE
Naziv propisa/akta	NACRT ZAKONA O PLATNIM USLUGAMA					
C 3. Izjava o nepostojanju dodatnih fiskalnih efekata predloženog propisa						
ZA REALIZACIJU NACRTA ZAKONA O PLATNIM USLUGAMA NIJE POTREBNO OBEZBIJEDITI FINANSIJSKA SREDSTVA IZ BUDŽETA FEDERACIJE BOSNE I HERCEGOVINE						
D 4. Pečat i potpis odgovornog lica						
Mjesto i datum						

